



續文獻通考卷之九十二

皇明進士雲間王圻纂輯

職官考 太僕大理鴻臚司農秘書司天將作

太僕寺

附行太僕寺苑馬寺

遼南面太僕寺官曰太僕寺卿曰太僕寺少卿曰太僕寺丞曰太僕寺主簿 南面有乘黃署 北面有飛黃院官曰飛龍使曰飛龍副使 典廐署北面有尚廐司官曰尚廐使曰尚廐副使有總領內外廐馬司官曰總領廐馬 諸牧監北面有西路群牧使司有倒塔嶺西路群牧使司有渾河北馬群司有漠南馬群司有漠北滑水馬群司有牛群司其設官曰某群太保曰某群侍中

曰其群敝史皆同又有總典群牧使司其官曰總典群牧部籍使曰群牧都林牙所屬有群牧司其官曰群牧使曰群牧副使

金不置太僕寺而尚廐局屬殿前都提點司提點正五品使從五品副使從六品掌御馬調習牧養以奉其事大定

二十九年添副使一員管小馬群直長一員司馬牛群掌廐都轄正九

品不限副轄從九品不限諸群牧所國言謂烏魯古

提控諸烏魯古一員正四品明昌四年置是年以安遠大將軍尚廐

局使石抹貞燕慶州刺使為之設使一人從四品國言

魯古副使一員從六品掌檢校群牧畜養蕃息之事判

官一員正八品掌僉判本所事知法一員從八品典

牧司貞祐時置使正七品副從八品判官正九品 圍

牧司興定二年置使正七品副正八品判官正九品

提舉圍牧所泰和三年隸各路統軍司 河南東路河

南西路陝西路皆設提舉同提舉山東路止設提舉

元制太僕寺秩從二品掌阿塔思馬匹受給造作鞍轡之

事世祖中統四年設群牧所至元十六年改尚牧監十

九年又改太僕院二十年改衛尉院二十四年罷院立

太僕寺又別置尚乘寺以管鞍轡而本寺止管阿塔思

馬匹二十五年隸中書置提調官二員武宗大德十一

年復改太僕院武宗至大四年仍為寺卿二員從二品

少卿二員從四品丞二員從五品經歷知事照磨管勾

各一員 典牧監文宗天曆二年置秩正三品卿二員
太監二員少監二員丞二員經歷知事照磨各一員吏
屬凡十二人掌孳畜之事屬詹事院 群牧監秩正二
品掌中宮位下孳畜隸徽政院卿二員太卿少卿監丞
各二員至大四年立至治三年罷

皇明

國初倣古置太僕寺以江北諸郡縣限于長江馬至京難
又滁介江淮多山山下故多曠土饒薦草莽水泉利可
牧故于 洪武六年設寺于滁卿品從三又置少卿二
人正四品弁寺丞等官專掌牧馬之事領滁陽等八監
驢驘等十八羣 二十八年省牧監屬有司置管馬官

于是各處馬匹印烙點視悉至滁及 永樂十九年定
鼎北京設太僕寺于滁去南京二字 洪熙元年于北
京仍稱行在于滁去南京二字 正統六年復永樂十
九年之舊于是順天等府及山東河南馬政悉屬于北
惟兩淮及江南北仍屬南京 弘治四年屬于南者印
烙不至滁而悉總于北

太祖洪武初定太僕寺官初名群牧所至是始定正卿一
人從三品少卿三人正四品寺丞八人正六品監正正
七品監副正八品主簿一人從七品苑圍長從九品錄
事未入流掌牧馬之事衙門設於滁州 永樂元年改
北平行太僕寺爲北京行太僕寺 四年置苑馬寺于

陝西甘肅遼東正卿一人正三品少卿二人正四品寺丞無定員正六品其屬主簿監牧監正監副錄事圍長各一人 六年又設北京苑馬寺領六監二十四苑十六年革馬歸北京行太僕寺牧民間凡領府衛州縣三百六十 八年改太僕寺 洪熙元年復稱北京行太僕寺 正統六年復定爲太僕寺云初 建文中改卿爲太僕卿增典廐典牧二署設驕驥十五群遂生三群分隸二署靖難後復故

太僕寺卿一人少卿三人寺丞八人其屬主簿一人常盈庫大使一人吏二十二人

卿掌牧馬之政令而聽於兵部少卿寺丞爲之貳少卿一人佐寺事一人督管馬一人督畿馬寺丞分理京衛畿府及山東河南六郡孳牧寄牧三年更凡牧人皆視其丁產而授馬馬蠲其役賦之則凡孳牧軍民皆有種馬馬有牝牡十二牝十八五歲徵馬一曰備用馬齊其馬力以給京邊將士將士足寄牧於畿府土非所宜及人民耗散或征馬金輸兵部市馬凡馬肥瘠登耗籍其毛齒而時省之三歲偕御史一人印烙選其良健而汰其羸劣凡草場歲徵其租金災稔出佐牧人市馬凡租金恩蠲或災蠲馬及馬金災蠲不得恩蠲即蠲必轉移相抵不得虧軍賦主簿勾省文移常盈庫貯馬金行太僕寺 洪武三十年置山西北平陝西遼東三處

寺置卿一人少卿一人寺丞無定員其屬主簿一人卿掌馬牧之事而聽於兵部少卿寺丞爲之貳凡邊衛營堡府州縣軍民壯騎操馬印烙課校孳牧以時督察之凡馬種牡十二牝十八馬金地畝十七椿朋十三凡馬瘠耗罰俸罰馬降級出革懲董之藩臬不得預馬事考馬官苑馬寺亦如之主簿典守籍牒

苑馬寺 永樂四年置於陝西甘肅六年又置於北平十六年并入行太僕寺遼東亦有苑馬寺

寺置卿一人少卿一人寺丞無定員其屬主簿一人各監牧監正一人監副一人圉長一人

卿掌馬牧之事而聽於兵部少卿寺丞爲之貳凡馬種上苑萬匹中苑七千下苑四千不及則以銀市茶易馬凡牧地曰草場曰荒地曰熟地嚴其禁令而封表之凡牧人曰恩軍曰隊軍曰改編之軍曰充筭之軍曰召募之軍曰抽選之軍皆藉而食之凡馬駒二年一科十八年而免定駒頭駒重駒籍而報之有常期凡虧駒有罰主簿如行太僕寺監正領苑監之事監副佐之錄事守籍牒圉長率群長而修牧事

事例

穆宗隆慶二年七月吏部議覆陝西撫臣張祉言苑馬寺行太僕寺均有圉牧之責二寺正卿徃自叅政陞補今則叅政有自二寺卿遷轉者惟是一倒置之間而事權

日輕人心懈弛馬政日趨于廢乞自今仍以叅政及年深副使推補果有異績亦照先年都御史車震事例擢之不次以重事權報可 五年六月掌吏部事高拱言行太僕寺苑馬寺專理馬政鹽運司專理鹽政皆國家要務所關非閑局也而近來視之甚輕即卿與使類以考不稱職有物議者充之夫既不稱職有物議矣則黜退可也柰何以是爲安置之所哉遂至奸貪苟且政務廢弛殊非 祖宗設官初意今宜破除常套凡卿員缺必以廉謹有才望者推補而又定其階格卿視布政司叅政卿視按察司副使俟政成之後一體陞選若有卓異即當超擢如 先朝故事 上亦以馬政鹽法國家重務必重其官乃可以責實効 命如拱議舉行 九月吏部覆御史褚鈇奏請裁革陝西行太僕寺苑馬寺寺丞各增設少卿一員與本寺卿俱兼按察司僉事職銜分理中東西三路以藩臬有才望者充之長樂靈武監正以舉人選補錄事圍長亦當授北方諳于養馬者令其專心罔政止聽巡茶御史鈐束其他撫按衙門毋得干預從之

大理寺

遼南面大理寺官曰大理寺卿曰大理寺少卿曰大理寺丞曰大理寺主簿外有提點大理寺有大理正 金大理寺天德二年置自少卿至評事漢人通設六員女

直契丹各四員卿正四品少卿從五品大理正正六品
 丞從六品掌審斷天下奏案詳讞疑獄司直四員正七
 品掌參議疑獄披詳法狀舊有契丹司直一員明昌二年罷評事三員
 正八品掌同司直明昌二年省契丹評事二員大安二年省漢人一員知法十一
 員從八品女直司五員漢人司六員掌檢斷刑名事明法二員從八
 品興定二年置同流外四年罷之
 元世祖至正二十二年陞大理寺為都護府秩正二品至
 大四年置經正監掌管盤納鉢及標撥投下草地有詞
 訟則治之本卿二員正三品太監二員從三品少監二
 員從四品監丞二員正五品經歷知事各一員卿太監
 少監並奴都赤為之監丞流官為之

皇明

太祖吳元年初置大理寺正三品衙門設卿少卿丞評事

洪武元年革 三年置磨勘司有令左右丞凡諸司

刑名錢糧有冤濫隱匿者稽其功過以聞 十四年復

置大理寺始改為正五品衙門其屬置二寺設左右寺

正左右寺副左右評事時翰林待制吳沉言刑冤濫請

增審獄官於是又設審刑司屬寺凡刑部十三道五軍

斷事官按囚覆問移審刑司評駁是非 十七年改建

刑部都察院大理寺審刑司五軍斷事官署於太平門

外名其所曰貫城 十九年罷審刑司 二十三年復

陞正卿三品與六部都察院通政司並 二十六年設

司務 二十九年復革案牘盡移後湖 三十一年九月建文君復置改寺爲司卿爲大理卿左右寺正爲都評事寺副爲副都評事司務爲都典簿靖難後盡革建文官制 永樂初復爲寺設官仍舊 十九年定鼎北京革行在於留都加南京二字 洪熙元年復稱行在於留都革南京二字 正統六年復永樂十九年之舊仍革行在二字定爲大理寺於留都仍加南京二字以別之然大理寺自永樂十九年以後凡天下刑名罪有出入者審駁悉歸於北委任視南尤重

成祖永樂中定設大理寺卿一人左右少卿各一人左右寺丞各一人其屬司務二人左右二寺各寺正一

副一人評事四人監生三十二人吏三十五人

卿掌審讞凡反刑獄之政令少卿寺丞爲之貳凡刑部十三道推問刑名按律例讞而復問其狀款服則決之否則駁訊必服乃決每歲會九卿朝審重囚凡錄囚徒會刑部都察院司務典出納文移左右寺分理京畿十三省刑名之事凡刑部十三道問理刑名據其由狀訊其人合律例若囚服准擬若否駁再擬改正曰照駁三擬不當糾問官曰叅駁悟律寃甚者移調問曰番異再異則請下九卿會問曰圓審凡已評允而尤未當者移再問曰追駁凡屢駁不改者徑請發落曰制決凡各省三司直隸死刑並讞已乃聽決按察司巡按巡撫惟死

刑呈部院轉讞凡笞杖罪移審徒流以上奏審凡律例無正條上下比請曰類奏平反刑獄狀南京有重囚平審而類奏亦如之

卿一人正三品左右少卿各一人正四品左右寺丞各一人正五品其屬左右寺正各一人正六品左右寺副各一人從六品左右評事四人正七品司務二人從九品掌審錄天下刑名有冤枉者 丘文莊曰刑部都察院大理寺主執法又謂之三法司大理之設則自兩法司所聽斷日抱成索引囚徒詣寺詳讞寃者疑者情輕重者皆得一一據律參駁必求之當然後月報歲聞於上請施行之其職亦重且要哉

鴻臚寺

典客署

遼南面有鴻臚寺官曰鴻臚寺卿曰鴻臚寺少卿曰鴻臚寺丞曰鴻臚寺主簿

北面客省局官曰客省局使曰客省局副使

總器物人醫獸醫三

局設都林牙

南面客省局大宗會同元年置官曰都客省口

客省使曰左客省使曰右客省使曰客省副使所屬有四方館官曰四方館使曰四方館副使有引進使司官曰引進使有點簽司官曰同點簽使事有禮信司官曰勾當禮信司有禮賓使司官曰禮賓使其上京東京各置客省司官曰省使曰省副使

金以鴻臚寺分屬宣徽院客省引進閣門諸使而鴻臚寺

不設外有四方館使正五品副使從六品掌提控諸路
驛舍驛馬并陳設器皿等事屬尚書兵部

元以禮部會同館掌接伴引見諸番蠻夷峒夷之來朝貢
者以通政院廩給司掌諸王諸番各省四方邊遠使客
飲食供張等事而鴻臚寺不設

皇明

國初置侍儀司爲從六品衙門職專朝儀宣贊等事 洪
武九年改爲殿庭禮儀司設使副承奉鳴贊序班 十
三年革承奉添設司儀 九年更使爲司正副爲左右
司副左右司丞 三十年始改鴻臚寺陞正四品衙門
定設卿少卿丞首領爲主簿其屬有司賓署丞司儀署

丞鳴贊序班後又設外夷通事亦隸焉 永樂十九年
定與北京在留都者加南京二字但南京正卿類用科
目出身而在北者多以監生選鳴贊出身累資陞正卿
隆慶元年例正卿仍用科目出身者推陞

鴻臚寺卿一人左右少卿各一人左右寺丞各一人其
屬主簿一人司賓司儀署各署丞一人鳴贊八人序班
五十四人吏八人

卿掌朝會賓客吉凶禮儀之事少卿寺丞爲之貳凡日
朝朔望朝大朝會宴享經筵進曆進春 冊封祭祀傳
制奏捷百官四夷見謝辭率其屬而供事焉主簿典
出納文移司賓典四夷朝貢首渠領從辨其等而教其

拜跪之節司儀典陳設引奏禮儀皆丞領之鳴贊贊禮
凡內贊通贊對贊接贊傳贊各供其事序班侍班齊班
糾儀引人舉案及傳贊

穆宗隆慶四年吏部覆郭諫臣奏太常鴻臚禮樂之司今
正卿宜仍用進士令其參酌禮儀約束官屬其別途出
身者太常寺至少卿而止鴻臚寺至左少卿而止秩滿
之日止許加俸

司農卿

遼南面有司農寺官曰司農卿曰司農少卿曰司農丞曰
司農主簿 上林署遼北面有監鳥獸詳穩司官曰監
某鳥獸詳穩曰監某鳥獸都監曰監某鳥人曰監某獸

人

金勸農使司泰和八年罷貞祐間復置興定六年罷勸農
司改立司農司使一員正三品副使一員正五品掌勸
課天下力田之事其司農司兼採公事者大司農一員
正二品卿三員正四品少卿三員正五品知事二員陝
西并河南三路置行司農司設官五員正大元年歸德
許州河南陝西各置卿一員正四品少卿一員正五品
丞一員正六品卿以下迭出巡按察官吏臧否而黜陟
之使節所過奸吏屏息十年之間民政修舉實賴其力
上林署屬工部官曰上林署提點從五品泰和八年
初大安二年省令從六品掌諸苑池沼種植花木菓蔬

及承奉行幸舟船事丞從七品大定七年增一員分司南京以勾判兼之大安

三年復直長二員正八品

元

世祖至元七年始置大司農司秩正二品凡農桑水利學

校饑荒之事悉掌之置官五員 十四年罷以按察司

兼領勸農事 十八年改立農正院置官六員 二十

年又改立務農司秩從三品 二十三年仍為大司農

司秩仍正二品 仁宗皇慶二年陞從一品定置大司

農四員從一品大司農卿二員正二品少卿二員從二

品大司農丞二員從二品經歷一員從五品都事二員

從七品架閣庫管勾一員照磨一員並正八品

上林署秩從七品 至元二十四年置署令署丞各一

員直長一員掌宮苑栽植花卉供進蔬菓首蓓以飼駝

馬備煤炭以給營繕隸大都留守所屬有養種園花園

首蓓園等職

道官署元之供膳司畧同秩從五品掌供給應需貨買

百色生料并桑哥籍入貲產 至元二十二年始置隸

司農置達魯花赤提點各一人司令一人丞一人所隸

官司三 輔用庫秩正九品掌規運息錢以給供需置

大使副使各一人 興中州等處油戶提領所秩從九

品 至元二十九年置歲辦油十萬斤以供內庖置提

領一人使同輔用庫 蔚州麵戶提領所掌辦白麵葱

萊以給應辦歲計十萬餘斤置提領副使各一人
諸屯監元世祖至元十八年置屯田打捕總管府于延
安設達魯花赤一人秩從三品管析居放良人戶并兀
思吉思田地比來蒙古人戶總管同知各一員屬官一
十二人又置屯田打捕所于北京設達魯花赤一人秩
從七品掌平灤等路析居放良不闡遺等戶長官一人
蒙古教授儒學教授各一人 至元二十四年立屯田
總管府于永平路置達魯花赤一人總管同知知事各
一人所轄昌國濟民豐贍三署各置令丞直長各一人
順帝至元四年陞兩淮屯田打捕總管府爲正三品 至
正十年置河北江南都總制庸田使司其屬有屯田總

管府凡五 十五年置軍民屯田使司于沛縣正三品
各路又有屯田萬戶府所置不一所領亦不專司農卿
也 籍田令世祖至元七年始立秩從六品掌耕種籍
田以奉宗廟祭祀隸大司農 十四年罷司農隸太常
寺 二十三年復立大司農司仍復隸焉署令一員從
六品署丞一員從七品司吏一人 時趙天麟上言聖
朝若稽古道既立司農司又令臨民官兼管內勸農事
凡以當務之爲急也伏望陛下軫於睿慮重此農桑躬
耕籍田后親蠶以先之凡農家之孝弟力田者鄉三老
其實舉之免其人當年所耕田租稅之半凡民恃富無
他故而有田不耕有桑不蠶者鄉三老其實舉之就於

當年倍科其閑田之租稅凡民老幼有田不能耕有桑不能蚕者令下之後限一年須要顧停客戶完置牛具違限者如無故不耕蠶之例凡勸農官管內有田桑無故不耕蠶者委廉訪司察勸農官而罰之凡逃戶田桑令下之後限一年官爲召人耕蠶違限則委廉訪司察勸農官而罰之凡勸農官皆可自具飲食若以後復有騷擾農家者委廉訪司察之如受賄之罪罪之如是則官皆慎勸民皆力耕男有餘粟女有餘帛矣

行大司農司秩二品設勸農營田司六秩四品使副各二員隸行大司農司

分司農司元順帝至正十三年立 先是脫脫言京畿

近水地利召募江南人耕種粟麥可收歲百萬餘石不煩海運京師足食於是立分司農司以右丞悟良哈台左丞烏古孫良禎兼大司農卿給分司農司印西自西山南自保定河間北抵檀順東及遷民鎮凡官地及元管各屯田悉從分司農司立法佃種給鈔五百萬錠以供工費牛具農器穀種用之又畧倣前集賢學士虞集議於江淮召募能種水田及修築圍堰之人各千人爲農師降名勅牒十二道募農民百人者授正九品秩二百人者正八品三百人者從七品就以領其所募之人所募農夫人給鈔十錠期年散歸

皇明

司農之職總于戶部不設司農卿及行司農等官惟上林苑監仍舊 洪武二十五年議開上林苑比圖上 上曰妨民業不可遂止 永樂五年始設今上林苑監正五品其屬良牧蕃育嘉蔬林衡水鑑典察左右前後十署各設典署署丞錄事 洪熙元年以蕃育蕪良牧林衡嘉蔬蕪水鑑林衡典察四署皆并蕃育嘉蔬 宣德十年定蕃育嘉蔬良牧林衡四署

上林苑監左右監正各一人左右監副各一人左右監丞各一人其屬典簿一人良牧蕃育林衡嘉蔬四署各典署一人署丞一人錄事二人吏六人監正掌苑囿園池牧畜種樹之事副丞爲之貳凡禽獸草木蔬菓率其

屬督其養戶栽戶以時經理其養地栽地而畜植之以供祭祀賓客 宮府之膳羞凡苑地東至白河西至西山南至武清北至居庸關西南至渾河並禁圍獵典簿勾校文移良牧牧牛羊豕蕃育育鶩鴨鷄皆籍其牝牡之數而課孳卵焉林衡典果實花木嘉蔬典蒔藝瓜菜皆計其畦町樹植之數而以時苞進焉

太府卿

遼南面太府監官曰太府太監曰太府少監曰太府監丞曰太府監主簿

金太府監左右藏支應所太倉酒坊典給署市買司隸焉 監正四品少監從五品丞二員從六品掌出納邦國財

用錢穀之事 左藏庫使從六品副使從七品

興定三年增一

員掌金銀珠玉寶貨錢幣本把 右藏庫使從六品副

使從七品興定三年增一員 掌錦帛絲綿毛褐諸道常課諸色

雜物本把 支應所又作支承所 都監二員正九品掌宮中

出入御前支賜金銀幣帛大安三年省 太倉使從六品掌

九穀廩藏內出之事御除人 副使從七品 酒坊部除 使從

八品副使正九品掌醞造御酒及支用諸色酒醴 典

給署本鈎盾署明昌三年更令從六品舊曰鈎盾使丞

從七品舊曰鈎盾副使掌宮中所用薪炭冰燭并管官

戶直長一員正八品鈎盾署古屬司農寺 市買司天德二年更

為市買局使從八品副使正九品掌收買宮中所用果

實生料諸物 平準務使從六品副使從七品勾當官

六員元光二年五月設十月罷

元制大府監秩正三品領左右藏等庫掌錢帛出納之數

太卿六員正三品太監六員從三品少監五員從四品

丞五員正五品經歷知事照磨各一員 中統四年置

至元四年為宣徽太府監凡內府藏庫悉隸焉十九年

九月分三庫二十二年立規措所主經營錢穀以善賈

為之秩從五品二十二年立泉府司秩從二品二十四

年陞萬億庫官秩四品 內藏庫提點四人使副各二

人掌出納御用諸王段疋納失失紗羅絨錦南錦香貨

諸物又主御用寶玉遠方珍異 右藏提點四人使副

各二人掌收支金銀寶鈔紵絲段疋只孫水晶瑪瑙玉璞諸物 左藏提點四人使副各二人掌收支常課和買紗羅布絹絲綿絨錦木棉舖陳衣服諸物

利用監與大府並列 至元十年置掌出納皮貨衣物之事監卿八人太監五人少監五人監丞四人經歷知事照磨管勾各一人所隸官司十 資用庫提點二人

大使三人副使五人 怯憐所皮局人匠提舉司提舉二人同提舉提控各一人 雜造雙線局大使副使直長典史各一人造內府皮貨鷹帽等物 熟皮局大使

副使直長各一人掌每歲熟造野獸皮貨等物 軟皮局大使副使直長各一人掌內府細色銀鼠野獸皮貨

等物 斜皮局副使二人掌每歲熟造內府各色野馬皮袴 貂鼠局提舉司提舉一人同提舉副提舉各一人 貂鼠局副使二人直長一人 染局副使一人直

長一人管勾一人掌每歲變染皮貨 熟皮局使副各一人典史一人 皇明酒醴掌之光祿金玉諸貨掌之十庫不設此官

秘書監

遼南面秘書監官曰秘書監曰秘書少監曰秘書監丞曰秘書監主簿外有秘書郎有秘書郎正字所屬著作局

有校書郎統和中楊佺嘗居此職下有校書正字

金秘書監著作局筆硯局書畫局司天臺隸馬監一員從

三品少監一員正五品丞一員正六品秘書郎二員正

七品泰和三年定為二員通掌經籍圖書校書郎一員從七品以

翰林官兼專掌校勘在監文籍 筆硯局直長二員正

八品掌御用筆墨等事 泰和七年以女直應奉兼舊

筆硯令史太定三年改為筆硯供奉以避諱改為承奉 書畫局直長一員正八

品掌御用書畫紙札都監正九品二員或一員 著作

局著作郎一員從六品著作佐郎一員從七品掌修日

曆皇統二年著作局設郎與佐郎各二員以學士院兼領之

元制秘書監秩正三品掌歷代圖籍并陰陽禁書卿四員

正三品太監二員從三品少監二員從四品監丞二員

從五品典簿一員從七品屬官著作郎二員從六品著

作佐郎二員正七品秘書郎二員正七品校書郎二員

正八品辨驗書畫直長一員正八品 至元九年置其

監丞皆用大臣奏薦選世家名臣子弟為之大德九年

陞正三品給銀印 延祐元年定置卿四員參用宦者

二人 順帝至元九年刻小玉印以至正珍秘為文凡

秘書監所掌書畫皆識之

皇明不設圖籍禁書藏之 內府

太史局令

遼太史令屬司天監

金不設

元特置太史院秩正二品掌天文曆數之事置院使五員

正二品同知二員正三品僉院二員從三品同僉二員
 正四品院判二員正五品經歷一員從五品都事一員
 從七品管勾一員從九品 春官正兼夏官正一人正
 五品 秋官正兼冬官中官正一人品同 保章正五
 人正七品 保章副五人正八品 掌曆二人正八品
 腹裏印曆管勾一人從九品 各省司曆十二人正
 九品 印曆管勾二人從九品 靈臺郎一人正七品
 監候六人從八品 副監候六人正九品 星曆生
 四十四人 挈壺正一人從八品 司辰郎二人正九
 品 燈漏直長一人 教授一人從八品 學正一人
 從九品 校書郎二人正八品

司天監

遼南向司天監有太史令其下曰司曆曰靈臺郎曰挈壺
 正曰五官正曰五官丞曰五官主簿曰五官靈臺郎曰
 保章正曰司曆監候曰司晨刻漏博士曰典鍾曰典鼓
 金司天臺隸秘書監提點正五品監從五品掌天文曆數
 風雲氣色密以奏聞少監從六品判官從八品教授舊
 設二員正大初省一員 係籍學生七十六人漢人五十
 人女直二十六人試補長行
 司天管勾從九品 不限資考員數隨科十人
 設一員以藝業尤精者充 長行人五
 十人 未授職事者
 試補管勾 天文科女直漢人各六人 筭律科八
 人 三式科四人 測驗科八人 漏刻科二十五人 銅儀法
 物舊在
 法物庫貞元二
 年始付本臺

元初因金人舊制立司天臺設官屬 至元八年以上都承應闕官增置行司天監 十五年別置太史院與臺並立頒曆之政歸院學校之設隸臺後改臺為監置司天監三人掌凡曆象之事少監五人丞四人知事一人通事兼知印一人官屬有提舉二人教授二人學正二人天文科管勾二人筭曆科管勾二人三式科管勾二人測驗科管勾二人漏刻科管勾二人陰陽管勾一人押宿官二人司辰官八人天文生七十五人 回回司天監初元世祖在潛邸有旨徵回回為星學官以其藝進未有官署 至元八年始置司天臺後改為監命秘書卿提調監事已別置提點一人司天監三人少監監丞各二人掌觀象衍曆知事通事兼知印各一人官屬有教授一人天文科管勾一人筭曆科管勾一人三式科管勾一人測驗科管勾一人漏刻科管勾一人陰陽生十八人 十二年春用王恂薦以許衡領太史院事初承用金大明曆歲久寔踈欲釐正之乃命王恂及楊恭懿郭守敬測驗改正而以張文謙張易董之恂言曆家知曆數不知曆理宜得許衡總之遂命衡領太史院事 十六年二月太史令王恂請建司天臺于大都儀象圭表皆銅為之增銅表至四十尺測影長而真又請上都洛陽等五處分置儀表各選監候官從之因勅郭守敬由上都抵南海測影具訪通天文曆數者

皇明

國初置欽天監正五品初名太史令通判僉判校事郎五官正劉基爲太史令兼太子率更令後改爲院設院使同知院判五官正典簿兩暘司時序郎紀候郎基又爲院使洪武元年改爲司天監設監令少監監丞主簿主事五官正副監候司晨漏刻博士又置回回司天監設監令少監監丞三年始改欽天監四年改監令爲正儀大夫少監分朔大夫五官正司玄大夫監丞靈臺郎五官保章正平秩郎五官靈臺郎司正郎挈壺正挈壺郎諸散官十四年再定品員散官給授如文官二十二年改監令監丞爲監正監副三十一年革回回監回回曆

法隸於欽天監

欽天監監正一人監副二人其屬主簿一人春夏中秋冬官正各一人五官靈臺郎四人五官保章正二人五官挈壺正一人五官監候二人五官司曆二人五官司辰二人漏刻博士二人吏四人

監正掌察天文定曆數監副爲之貳凡日月星辰風雲氣色之變異率其屬而占候焉密疏上凡玄象圖書非其職不得預凡習業者分爲四科曰天文曰漏刻曰回回曰曆自五官正下至天文生陰陽人各專科肄焉凡觀象登臺臺四面面四人凡歲大統曆御覽月令曆七政躔度曆六壬遁甲曆並先期奏行下凡曆註上曆三

續文獻通考 卷之九十一
十事民曆三十二事壬遁曆六十七事凡歲祭日先一
歲會選奏上凡營建師旅冠婚 陵寢選地擇日凡立
春先期候氣於東郊凡大朝賀設定時鼓於文樓報時
鷄唱擊鼓各共其事凡四季天象占驗曆 御覽天象
錄以時奏上凡疇人世業立師而教之乏人移禮部訪
取試用之五官正專理曆法造曆司曆監候佐之靈臺
郎辨日月星辰之躔次分野以占候天文之變凡瑞星
妖星瑞氣妖氣考諸雜占保章正專志天文之變辨其
吉凶之占挈壺正知漏刻孔壺爲漏浮箭爲刻以考中
星昏明之候漏刻博士定時更時報更警晨昏皆鍾鼓
司佐之

事例

凡天文如日月星辰風雲霾霧本監各委官生晝夜占
候或有變異舊例自具白本占奏 正統後始會堂上
官僉書同奏其觀象臺分定四面每面天文生四人專
視 凡本監觀星有盤係 洪武十七年造又渾天璿
璣玉衡簡儀俱 正統四年造十一年奏准簡儀修刻
黃道等度圭表壺漏俱如南京舊制又造晷影堂以便
窺測調品 景泰六年又造簡儀銅壺 凡定時刻有
漏換時有牌報更有鼓警晨昏有鍾鼓其器皆設於譙
樓初皆屬順天府 正統六年改屬本監輪差漏刻博
士提調陰陽人如法調壺換牌其陰陽人仍從順天府

各縣僉克鍾鼓改屬旗手衛撥軍擊撞 凡推筭日月
交食本監先期備開分秒時刻并起復方位具奏禮部
通行內外諸司臨時救護食畢本監仍按占書具奏如
食不及一分與回回曆雖食一分以上俱不行救護至
救護時本監官專報時候不隨班行禮 凡歲造大統
曆先期二月初一日進呈來歲曆樣然後刊造一十五
本送禮部差人齋至南京并各布政司照樣刊印 凡
每歲進 御覽月令曆大統曆七政躔度曆 洪武間
以九月初一日進後以十一月初一日進當日以大統
曆給 賜百官頒行天下 東宮曆同日於 文華殿
進其儀注俱見禮部祠祭司 太皇太后 皇太后

中宮曆俱司禮監官捧進本監仍具本奏知凡頒曆後
各 王府差人於 內府司禮監關領其 內府各衙
門亦於司禮監給散如琉球占城等外國正統以前俱
因朝貢每國給與王曆一本民曆十本今常給者惟朝
鮮國王曆一本民曆一百本 凡造曆以 洪武甲子
爲曆元仍依舊法推筭不用捷法 洪武九年 欽定
曆註永爲遵守 上曆註三十事 東宮親王曆同民
曆註三十二事 永樂七年 欽定壬遁曆註六十二
事 凡進用諸曆俱以紅墨字分辨并各有尺寸裁造
親王諸曆及民曆亦各依式裁造其黃藍綾絹及黃
紙裹造者俱有定式 凡頒曆 洪武初有司徵斂工

續文獻通考卷之九十一
本錢十四年免徵 永樂後合用各色綾絹紙劄顏料
俱先二年十二月內會計有無閏月合用若干奏行山
東等布政司真定等七府買辦 凡選郊祀時享等項
日期每歲十一月中本監堂上官擇日率曆科官午後
沐浴更衣於本衙門齋宿次日早會選具副本請 旨
仍具例行 內府中路分設案題本得 旨次日早堂
印官捧正本照例行至 奉天門案前跪進俟 御覽
畢叩頭由東門出復班仍具揭帖差官齋赴禮部太常
寺知會 凡營造出師等事奉 旨選擇年月日時方
位進呈若 陵寢及各 王府安葬選擇吉地奏用其
差委官生各有次第不許紊亂 凡每歲立春日本監

差官二員往順天府候氣回監具呈依書占奏 凡立
春前期候氣官同順天府官赴東直門外導引芒神春
牛至府 凡遇 聖節正旦冬至及頒 詔大禮先期
本監官面奏設定時鼓於文樓至期定時漏刻博士一
員報時五官司辰一員立 御道東鷄唱五官司辰一
員擊鼓漏刻博士一員登文樓候 上陞殿鳴鞭已畢
報時官捧時牌報卯時鷄唱官唱日出卯照萬方光四
表畢擊鼓五聲 凡本監人員 洪武六年令永遠不
許遷動子孫只習學天文曆筭不許習他業其不習學
者發海南充軍 凡本監官犯罪 成化十三年奏准
應爲民者仍充天文生應役應發充軍者奏請處治

凡本監官生有父母喪例免丁憂 凡天文生除本身外再免一丁充當民差陰陽人止免本身其各衙門不係應免者不惟 凡天文生食糧月支七斗陰陽人四斗俱照醫士醫生例其譙樓陰陽人正支三斗 凡天文生俱以父祖世業代補有缺舊例天下訪取仍會禮部考驗收用後或有投充及收用義男女壻者禮部議准不許止選世業子弟立教師教習有成遇天文生缺於內選用其教師亦量陞授 弘治十一年令訪取世業原籍子孫并山林隱逸之士及致仕退閒等項官吏并監生生員軍民人等有能精通天文曆數陰陽地理及五星子平遁甲大定并六壬占課灼龜等術者每府不過一二人試中收充供役 凡觀象臺譙樓合用燈油木炭等及祭祀齋宮調品壺漏亦有油炭俱行禮部坐派順天府送用 凡天下府州縣舉到陰陽人堪任正術等官者俱從吏部送本監考中送回選用不中者發回原籍爲民原保官吏治罪 凡本監合用紙劄成化間奏准照例遇吏部送考陰陽生中式者令其量出應用 凡天文生有犯 弘治十三年奏准徒流照舊例決杖一百餘罪收贖笞杖有力納鈔無力的決其犯竊盜掏摸搶奪等項亦刺字充警并雜犯死罪俱做工不在收贖之限 凡本監俸糧初於禮部支給後從戶部撥本監自行收放

南京欽天監事例

凡本監造曆每年六月內從禮部發到曆樣印完給散
南京各衙門并直隸各府州縣 凡本監造曆紙分派
應天寧國二府并浙江解納俱限六月以裏至京 凡
占候天象本監自 洪武以來設觀星臺於鷄鳴山上
令天文生分班晝夜觀望或有變異開具揭帖呈堂上
官奏聞者隨即具奏 凡天文生俱以世業子弟習學
考選食糧分撥各科 凡天文生月糧照欽天監例

殿中監

遼北面有著帳郎君院官曰著帳郎君節度使曰司徒

輦痕德重可汗以蒲古只等三族害于越宰魯以其家屬沒入瓦里應天皇太后知國政析出之以為著帳郎

君娘子每加矜恤世宗悉免之其後內族外戚入之
之家罪犯者皆沒入瓦里人戶益眾因復故名皇太
皇太妃皆有著帳諸局叛逆家屬執
事禁衛此遼所以多變起肘腋也

祇候郎君班詳穩司官曰祇候郎君班詳穩曰直長曰
闡撒絨曰祇候郎君曰祇候郎君拽刺走卒外又有左

右祇候郎君班詳穩司官屬各同上 筆硯局 牌印

局 裊褥局 燈燭局 牀帽局 殿幄局 車輿局

御盞局 本班局八局並設祇候郎君與吏 皇太

后祇應司 皇太妃祇應司 皇后祇應司 近位祇

應司 皇太子祇應司 親王祇應諸司並設領局事

與知諸司事 著帳戶司官曰著帳節度使曰著帳殿

中 著帳戶司本諸幹魯朶戶析出及諸色人犯罪沒入
凡御帳皇太后皇太妃皇后皇太子親王祇從伶官

皆充其役 承應小底局 筆硯小底 寢殿小底 佛殿

小底 司藏小底 習馬小底 鷹坊小底 藥湯小

底 尚飲小底 盥漱小底 尚膳小底 尚衣小底

裁造小底 南面殿中司隸于御史臺官曰殿中曰

殿中丞其屬有尚舍局奉御尚乘局奉御尚輦局奉御

尚食局奉御尚衣局奉御

金殿中監事多領于殿前都點檢司其官屬載于殿前司

目下其分領符寶郎宿直將軍振肅宮籍監近侍等諸

局署鷹坊頓舍官載于此 符寶郎四員見前門下省符寶司

左右宿直將軍從五品掌總領親軍凡宮城諸門衛禁

并行從宿衛之事八員 左右振肅正七品掌妃嬪出

入總領護衛導從 宮籍監提點正五品監從五品副

監從六品丞從七品掌內外監戶及地土錢帛大小差

發直長二員正八品掌同 近侍局提點正五品泰和

八年朔設使從五品副使從六品掌侍從承勅令轉奏

進帖直長正八品大定十八年增二員奉御十六人舊名入寢殿小底奉職三十人又名外

帳小底大定 器物局提點正五品使從五品副使從

六品掌進御器械鞍轡諸物直長正八品監都正九品

月昌二年省 同監從九品泰和四年設 尚廐局官見前太僕寺典廐署

尚輦局使從五品副使從六品掌承奉輿輦等事

直長正八品資考不拘 典輿都轄從九品資考不拘 收支都監

正九品大定二年設 掌給受之事同監從九品泰和四年設 本把

四人 鷹坊提點見前司農寺林署下 武庫署令從六品掌

收貯諸路常課甲仗以曉軍器女直人充 丞從七品直長二員正

八品太定二年 武器署提點從五品令從六品丞從

七品掌祭祀朝會巡幸及公卿婚葬鹵簿儀仗旗鼓笛

角之事直長正八品或二員 頓舍官二員泰和令總格作四員 正八

品

元

元初殿中監事皆領於四怯薛而兼宿衛四怯薛者太祖

功臣博爾忽博爾木木華黎赤老溫四族也號撥里班

曲律猶華言四傑也命其世領怯薛之長怯薛云者猶

言番直宿衛也凡宿衛三日一更申酉戌日博爾忽領

之為第一亥子丑日博爾木領之為第二寅卯辰日木

華黎領之為第三巳午未日赤老溫領之為第四博爾

忽早絕太祖命別速部代之而非功臣之類因自領名

曰也可怯薛也可者言天子自領也赤老溫後亦絕常

以丞相兼領凡怯薛內其執事之名不一具列于後

主弓矢鷹隼者曰火兒赤昔寶赤怯憐赤 主書寫聖

旨者曰札里赤 主文書者曰必閣赤 主奉烹膳者

曰博爾赤 主司閹者曰八刺哈赤 主掌酒者曰谷

刺赤 主典車馬者曰兀刺赤 主衣服者曰速古兒

赤 主牧駱駝者曰帖麥赤 主牧羊者曰火爾赤

主捕盜者曰忽刺罕赤 主奏樂者曰虎火赤 忠勇

續文獻通考卷之九十二

者曰霸魯都勇敢無敵者曰拔突長以上怯薛悉世
守之年勞既久即擢爲一品官其預怯薛者或以才能
任使貴盛雖極然一日歸至內庭則執事如故其後怯
薛累增至萬四千八百而累朝幹耳朶怯薛尤多國家
大費每糜於此云

文宗至順元年八月沙汰衛士省院臺官奏定擬大內四
宿衛每衛不過四百人累朝宿衛各不過二百人鷹坊
萬四千二十四人當減四千人內養九十九人及怯薛
當留者各百人累朝舊邸官分養人三千二百二十四
人當留者一千一百二十人媵臣怯薛口共萬人當留
者六千人其汰斥者歸本部著籍應役有容匿濫充者

怯薛官與其長杖五十七没家貲之半賞告者令監察
御史常察之制曰可

陶宗儀曰元朝有四怯薛大官怯薛者分宿衛供奉之
士爲四番番三晝夜凡上之起居飲食諸服御之政令
怯薛之長皆總焉中有云都赤乃侍御之至親近者雖
官隨朝諸司亦三日一次輪流入直負骨朶于背佩環
刀于腰或三人四人多至八人時若上御控鶴則在墀
陛之下蓋所以虞奸回也雖宰輔之日覲清光然有所
奏請無云都赤在則不敢進今中書移咨各省或有須
備錄奏文字者內必有云都赤某等以此之故又究骨
朶字義嘗記宋景文筆記曰關中人以腹大爲胍朶

音都 俗音謂杖頭大者亦曰胍胍後訛為骨朶朶平聲

二年置侍正府郎殿中監職也秩正二品侍正十四人

同知二人僉府二人侍判二人掌內庭近侍之事領速

古兒赤四百人奉御二十四人拱衛直都指揮使司為

其屬首領官有經歷都事照磨餘小吏有差 奉御二

十四員秩五品 尚冠奉御二員從五品 尚冠副奉

御二員從六品 尚衣奉御二員從五品 尚衣副奉

御二員從六品 尚鑾奉御二員從五品 尚鑾副奉

御二員從六品 尚沐奉御二員從五品 尚沐副奉

御二員從六品 尚飾兼尚輦二員正六品 尚飾兼

尚輦副奉御二員正七品 奉御掌簿四員從七品

尚乘之職舊本隸殿中監而元特立尚乘寺秩從三品

掌上御鞍轡輿輦阿塔思群牧駙馬驢騾及領隨路局

院鞍轡等造作收支行省歲造鞍轡理四怯薛阿赤詞

訟起取南北遠方馬匹等事卿四員正三品少卿二員

從四品丞二員從五品經歷知事照磨管勾各一員至

元二十四年罷衛尉院始設尚乘寺領資乘庫大德十

一年升為院秩從二品至大四年復為寺延祐四年降

從三品 資乘庫提點四人大使三人副使四人掌收

支等物

皇明奉御諸事俱屬內侍此官不設

少府監

遼南面少府事寄于殿中司而少府監不設

金少府監尚方織染文思裁造文繡等署隸焉泰和四年選能幹官

兼儀鸞局近上官 監正四品少監從五品丞二員從六品太定十一年省二十一年復置

掌邦國百官營造之事 尚方署令從六品

丞從七品掌造金銀器物亭帳車輿牀榻簾蓆鞍轡傘

扇及裝釘之事太定二十年令不專除人令人兼 直長正八品 圖畫

署明昌七年省入祗應司 令從六品丞從七品掌圖書鏤金 匠

直長正八品明昌三年省 裁造署令從六品丞從七品掌

造龍鳳車具亭帳舖陳諸物宮中隨位牀榻屏風簾額

條結等及陵廟諸物并臺省部內所用物泰和令有直繪畫之事

長從八品明昌三年省裁造匠六人針工婦人三十七人 文繡署令從六品

丞從七品掌繡造御用并妃嬪等服飾及燭籠照道花

并貞祐二年止設官一員 直長正八品繡工一人都繡頭一人副

人內上頭七十六人等凡四各二十六人 織染局令從六品丞從七品直

長正八品掌織絳色染諸供御及宮中錦綺幣帛紗縠

文思署明昌七年省入祗應司 令從六品丞從七品掌造內外

局分印合傘浮圖金銀等尚輦儀鸞局車具亭帳之物

并三國生日等禮物繡染文繡兩署金線直長正八品

明昌三年省

元世祖至元十九年以大都留守兼知少府監事二十一

年并少府監歸留守司皇慶元年別置少府監延祐七

年罷少府監復以留守兼監事其屬多詳于留守司而

續文獻通考 卷之九十二 三百六

中尚監乃特立者外又勅章佩監皆少府事 中尚監
 掌大幹耳朶位下怯恰口諸務及領資成庫擅作供內
 府陳設帳房帟幙車輿雨衣之用監卿八員正三品太
 監二員從三品少監二員從四品監丞二員正五品經
 歷知事照磨各一員 至元十五年置尚用監二十六
 年改置中尚監三十年分置兩都灤河三庫怯恰口雜
 造等九司局而總領之 至大元年陞為院四年復為
 監叅用宦者三人 資成庫掌造擅貨提點三員從五
 品大使三員正六品副使三員正七品 至元二年罷
 置太府二十三年始歸于監 章佩監掌宦者速古兒
 赤所收御服寶帶監卿五員正三品太監四員從三品

少監二員從四品監丞二員正五品經歷知事照磨各
 一員 至元二十二年置 至大元年陞為院四年復
 為監 御帶庫掌繫腰偏束等物并條環諸物供奉御
 用以備賜予提點三員大使三員副使二員品秩同資
 成 至元二十八年置 以中官為之元貞元年增二
 員兼署上都之事 異珍庫掌御用珍寶后妃公主首
 飾寶貝官員品秩俱同上至元二十八年置

將作監

遼北面器物局 有局使局副使又總客省大醫獸醫置
 四局都林牙 南面將作監官曰太監曰少監曰監丞
 曰監主簿

金將作監不設屬工部者有修內司大定七年設使從五品副

使從六品掌宮中營造事兵匠一千六十五人兵夫二千人仍命少府監長官提控

直長二員正八品部役官四員正八品掌監督工役受

給官二員正八品掌支納諸物 都城所提舉從六品

同提舉從七品掌修完廟社及城隍門鑰百司公廨係

官舍并栽植樹木工役等事左右廂官各二員正八品

掌監督工役受給官二員正八品掌支納諸物及埏埴

等事 祇應司提點從五品令從六品丞從七品掌給

宮中諸色工作直長正八品收支庫都監同監泰和元年置

甄官署令從六品丞從七品直長正八品掌剡石及埏

埴之事

元將作院掌成造金玉珠翠犀象寶貝冠佩器皿織造刺

繡段匹異樣百色造作定置院使七員正二品同知二

員正三品同僉二員正四品院判二員正五品經歷一

員從五品都事一員從七品照磨管勾一員正八品令

史六人譯史知印各二人宣使四人其修建宮殿等事

務中統二年立宮殿府專職管繕事 至元十九年罷

宮殿府以其事屬大都留守司將作所屬附見

諸路金玉人匠總管府掌寶貝金玉冠帽繫腰束帶金

銀器皿并總諸司局事總隸將作院定置達魯花赤二

員正二品總管二員從三品副達魯花赤二員正四品同

知二員從四品副總管二員正五品經歷一員從七品

知事一員從八品照磨管勾各一員 玉局提舉司提舉一員正七品同提舉一員從七品副提舉一員正八品 中統二年以和林人匠置局造作始設直長 至元三年立玉匠局用七品印十五年改提舉司 金銀器盒提舉司官員品秩俱同上 瑪瑙提舉司提舉一員同提舉一員吏目一員 至元九年置大都等處瑪瑙局秩從七品管領瑪瑙匠戶五百有奇置提舉三員受金玉府劄十五年改立提舉司領大都弘州兩處造作陞從五品三十年減副提舉一員定置如上 陽山瑪瑙提舉司至元十五年置提舉同副共三員品秩如前 金絲子局大使一員從五品副使一員正七品直

長一員 中統二年設二局二十四年併 鞞帶斜皮局大使一員從八品副使一員正九品至元十五年置 璫玉局大使一員從八品至元十五年置 浮梁磁局掌燒造磁器并漆造馬尾梭藤笠帽等事大使一員正九品副使一員至元十五年置 畫局掌描造諸色樣製大使一員從八品至元十五年置 管領珠子民匠官掌採撈蛤珠於楊村直沽等處 中統二年立管領官正七品子孫世襲 裝釘局大使一員從八品至元十五年置 大小雕木局大使一員從八品至元十五年置 宣德隆興等處瑪瑙人匠提舉司提舉一員從七品副提舉一員從八品至元十五年置 溫犀玳

瑁局大使一員從八品至元十五年置 上都金銀器
盒局大使一員從六品副使直長各一員至元十六年
置 漆紗冠冕局大使副使各一員至元十五年置
大都路採砂所至元十六年置管領大同路撥到民一
百六戶歲採磨玉夏水砂二百石起運大都以給玉工
磨礪之用大使一員 管領都提領所都提領一員從
七品掌金玉府諸人匠詞訟至元十三年置 監造諸
般寶貝官達魯花赤二員正五品至元二十一年置
收支諸物庫大使從八品副使一員正九品至元十五
年置 行諸路金玉人匠總管府至大間置于杭州達
魯花赤總管各一員並從三品同知一員正五品副總

管一員從五品經歷一員從七品知事一員從八品提
控按牘一員

異樣局總管府中統二年立提點所至元六年改總管
府定置達魯花赤一員總管一員並正三品同知一員
從四品副總管一員從五品經歷一員從七品知事一
員從八品 異樣紋繡提舉司中統二年立局至元十
四年改提舉司提舉一員從五品同提舉一員正七品
副提舉一員正八品 綾錦織染提舉司至元二十四
年改局置提舉司官數品秩俱同上 紗羅提舉司至
元十二年改局置提舉司官數品秩俱同上 紗金顏
料總庫中統二年置大使一員從九品副使一員

大都等路民匠總管府總管一員正三品同知一員正五品副總管一員從五品經歷一員從七品知事一員從八品提控案牘一員 備章總院大使一員正六品副使一員從六品至元十三年省併揚蘭等八局為總局 尚衣局達魯花赤提舉各一員從五品同提舉一員正七品副提舉一員正八品都目一人 御衣局設官同上皆至元二年置 御衣史道安局秩從六品至元二年置以史道安掌其職因以名之 高麗提舉司從五品至元二十二年置提舉一員 織佛像提舉司秩五品延祐四年改提領所為提舉司提舉副提舉各二員

皇明設文思院等衙門屬工部專掌造作諸事不設少府將作二監 文思院大使一員副使二員 洪熙元年添設大使副使共六員分管院事後裁革 巾帽局設于 內府大使一員副使一員後俱革 針工局設于 內府大使一員副使一員後俱革 營繕所所正二員後革所副二員所丞二員 後添設二員管器 四年隆慶三年革 皮作局大使一員副使二員革 顏料局後革大使一員 寶源局大使一員副使一員嘉靖四十年革 鞍轡局大使一員副使一員隆慶元年 俱革 軍器局大使一員副使二員後革 節慎庫嘉靖八年 設大使一員 廣積抽分竹木局後添大使一員副使一員隆慶五年 革 通積抽分竹木局後添大使一員

後革副使一員廣濟白河二局兼之織染所雜造局後添設大使一

員副使一員盧溝橋通州白河三處抽分竹木局添設

大使各一員副使各一員後革正統九年添設盧溝橋副

使二員後革大通關提舉司提舉一員萬曆二年革副提舉

二員後革典史一員革柴炭司大使一員副使一員

龍江提舉司提舉一員副提舉二員典史一員龍江

抽分竹木局後革大使一員副使二員後又添設二員

續文獻通考卷之九十二終

續文獻通考卷之九十三

皇明進士雲間王圻纂輯

職官考 國子監宗學軍器監都水監內侍省

國子監

遼南面國子監太祖置於上京中京國子學隸焉官曰祭

酒曰司業曰監丞曰主簿

金海陵天德三年初置國子監國子學太學皆隸焉官祭

酒正四品司業正五品掌學校丞二員從六品明昌二

年增一員兼提控女直學

元世祖至元初以許衡為集賢館大學士國子祭酒教國

子與蒙古大姓四怯薛人員選七品以上朝官子孫為

國子生隨朝三品以上官得舉凡民之俊秀者入學為陪堂生伴讀至元二十四年始置監祭酒一員從三品司業二員正五品掌學之教令皆德尊望重者為之監丞一員正六品專領監務典簿一員令史二人譯史知印典吏各一人皇慶二年置崇文閣于國子監外別有國子學 蒙古國子監世祖至元十四年始立至二十九年准漢人國子監例置祭酒司業監丞秩亦同外有蒙古國子學世祖至元八年置掌教習諸生於隨朝百官怯薛台蒙古漢兒官員家選子弟俊秀者入學

國子博士

遼南面五京各設國子學有博士有助教其在南京者曰

太學

金國子學博士二員正七品分掌教授生員考藝業太學同明

昌二年添女直一員泰和四年減大安二年並罷助教二員正八品女直漢人各一員

教授四員正八品分掌教誨諸生明昌二年小學各添二員承安五年除一

員國子校勘從八品掌校勘文字國子書寫官從八品

掌書寫實錄 太學博士四員正七品大安二年減二員助教

四員正八品明昌二年除一員大安二年減二員國子學與太學皆隸國

子監

元國子學秩正七品置博士二員掌教授生徒考校儒人

著述教官所業文字助教四員分教各齋生員大德八

年為分職上都增置助教二員學正二員學錄二員督

習課業典給一員掌生員饘食國子監與國子學皆隸集賢院 興文署秩從六品署令一員以翰林修撰兼之署丞一員以翰林應奉兼之至治二年罷置典簿一員從七品掌提調諸生飲饗與凡文牘簿書之事隸集賢院

蒙古國子學初置博士教授助教官五員後以每歲從駕上都教習事煩增學正學錄各二人三十一年又增助教一人與蒙古國子監俱隸蒙古翰林院

皇明

太祖乙巳歲置國子學以元故集慶路儒學為之設博士助教學正學錄典樂典膳等官 吳元年定國子

學官制添設祭酒正四品司業正五品博士正七品典簿正八品助教從八品學正正九品學錄從九品典膳省註十年置中都國子學十四年更祭酒一人從四品司業二人正六品其屬監丞二人正八品博士五人助教十五人典簿一人俱從八品學正十人正九品學錄七人典膳一人俱從九品掌饌二人雜職十五年相地于都城之北改國子學為國子監頒教條及禁例于天下二十六年革中都國子監三十一年壽州學訓導劉亨疏國子祭酒品位不當在太僕寺卿下 上頗納其說後惟陞監丞為堂上官 成祖即位詔復洪武官制監丞仍舊屬官 永樂元年設北京國子監列為二監

續文獻通考 卷之九十三 三 四百五十一
至十九年定鼎北京于留都加南京二字 宣德元年
省司業至 弘治十五年復置然二監雖並列而治法
本原實始于南

國初爲國子學正四品設博士助教學正學錄典樂典書
典膳乙巳秋以許存仁爲博士吳元年添設祭酒司業
典簿改典膳爲掌饌陞存仁爲祭酒劉承直司業蘇伯
衡學正洪武六年增廣國子生 諭禮部祭酒乏人其
詢天下名士通今博古才德堪爲人師者以名聞八年
又置中都國子學十五年始改國子學爲國子監從四
品十六年宋訥代吳顯爲祭酒 命曹國公李文忠領
國子監事 車駕時時臨視以故監官不得中廳而坐

中門而行二十六年革中都國子學建文中陞監丞爲
堂上官增司業二人省博士學正學錄增助教十七人
靖難後復故

祭酒掌國學舉人貢生官生恩生功生例生夷生年幼
勲臣訓教之事司業爲之貳凡訓教諸臣奉監規而損
益焉要在明體適用以孝弟忠信禮義庶耻爲本隆師
親友讀書寫字爲業有不率者朴之不悛徙謫之其率
教者有升堂積分及超格叙用之法凡課業做書季呈
翰林院文冊歲奏上凡歲仲春秋上丁 遣大臣祀先
師則總其禮儀 上謁先師幸太學及司業執經講義
凡授經以易書詩春秋禮記人占一經大學中庸論語

孟子兼習之以廩饌贍師生以力役給厨膳以賜予
 示恩賚以寧假悉人情以撥歷練吏事以考選汰冗濫
 監丞坐繩愆廳叅領監事凡師生怠教不率教及廩膳
 不潔並糾懲之而堅明其約束師生有過書而識之博
 士坐博士廳五人分經訓教助教學正學錄坐正義崇
 志廣業修道誠心率性堂專職教誨嚴程課講解經義
 文字約之規矩典簿典出納文移受支金錢季報課業
 典籍收掌經史子集及制書掌饌飲食師生
 太祖親製條規十八款于監即今之監規云仍令天下各學勒卧
 碑以示諸生詳見學校下

宗學 內小學

宋寧宗嘉定七年復建宗學置博士學諭各一人遼金元
 無其職

理宗淳祐七年以皇姪孟啓開講於內小學置直講贊講
 二人遼金元不設

皇明不設此官別有宗學一欵見學校門
 軍器監

遼北面有五冶官設太師未詳所司大率掌治軍器
 金承安二年設軍器監泰和四年罷復并甲坊利器兩署
 為軍器署置令丞直長直隸兵部至寧元年復為軍器
 監軍器庫利器署隸馬舊轄甲坊利器兩署監從五品少監從六
 品丞從七品掌修治邦國戎器之事直長正八品 軍

器局至寧元年隸太興府貞祐三年改屬本監使正八

品副使正九品省擬不奏掌收支河南一路并在京所造常

課橫添和買軍器大定五年設甲坊署泰和四年廢舊置令

丞直長 利器署本部作院興定二年更今名令從六

品丞從七品掌修弓弩刀槊之屬直長正八品 八作

左右院使從五品副使從六品掌收軍須軍器此不隸

軍器監 軍器庫使一員正八品副使一員從九品掌

甲冑兵仗司吏二人庫子掌出納之數看守巡護中都

南京依此置西京省副使北京惟副使仍兼

人作使隨府節鎮設使副若軍器兼作院軍資兼軍

器庫及防刺郡則置都監一員以軍資監者如舊此

不隸軍器監 作院使一員副使一員掌監造軍器兼

管囚徒判院事都監一員掌收支之事牢長監管囚徒

及差設作子中

軍器監

元為武備寺掌繕治戎器兼典受給卿四員正三品同判

六員從三品少卿四員從四品丞四員從五品經歷知

事各一員照磨兼提控案牘一員承發架閣庫管勾一

員辨驗弓官二員辨驗筋角翎毛等官二員令史十有

三人 至元五年始立軍器監秩四品十九年陞正三

品二十年立衛尉院改軍器監為武備監秩正四品隸

衛尉院二十一年改監為寺與衛尉並立 大德十一

年陞為院 至大四年復為寺設官如舊其所轄屬官

則自爲選擇其匠戶之能者任之 壽武庫提點二員
從五品大使二員正六品副使四員正七品庫子十人
至元十年以衣甲監改置 利器庫提點三員大使
二員副使三員品秩同壽武庫庫子十人 至元五年
始立軍器庫十年通掌隨路軍器改利器庫 廣勝庫
掌平陽太原等處歲造兵器以給北邊征戍軍需達魯
花赤一員大使副使各一員品秩同上 大同平陽太
原保定真定蔚州宣德東平大寧遼河各路軍器人匠
提舉司通州薊州各甲局提舉司大都弓匠提舉司各
置達魯花赤提舉同提舉副提舉各一員或有無達魯
花赤者品秩自從五品至六品不一 懷孟河南汴梁

彰德大名咸平隆興等路各軍器人匠局益都濟南箭
局秩皆正七品或從七品各設局使局副一員箭局無
副咸平隆興有達魯花赤興州松州及廣平路諸甲局
各院長一員其興州松州屬上都甲局奉聖歸德汝寧
陳州各軍器局院長一員奉聖文州許州平灤各軍器
局大都箭局絃局各大使副使一員 上都雜造局秩
正七品大使副使各一員 大都雜造局提領一員
豐州雜造局秩正六品達魯花赤大使副使各一員
皇明製造軍器等事俱屬軍器局及虞衡司隸工部不設
監

都水監

遼南面都水監設官曰都水太監曰都水少監曰都水監丞曰都水監主簿

金都水監街道司隸馬分治監專規措黃沁河衛州置司

監正四品掌川澤津梁舟楫河渠之事興定五年兼管

勾沿河漕運事作從五品少監正六品以下皆同兼漕

事少監從五品明昌二年增一員衛州分治丞二員正七品內一員

外監分治貞元元年置掾正八品掌與丞同外監分治

大定二十七年添一員明昌二年併罷之六年復置二員勾當官四員准備分治監

差委明昌五年以罷掾設二員街道司管勾正九品掌洒

掃街道修治溝渠 都巡河官從七品掌巡治河道修

完堤堰栽植榆柳凡河防之事分治監巡河官同此

瀘溝崇福上下埽都巡河兼石橋使通濟河都巡河兼

建春宮地分河道諸都巡河官掌提控諸埽巡河官明昌

五年設以今得縣令人年六十者選充大定二年設滹沱河巡河官二員黃汴都巡河官

下六處河陰雄武熒澤原武陽武延津各設散巡河官

一員于諸局及丞簿庶舉人并見勾當八六十以下者充黃沁都巡河官下四

處懷州孟津孟州城北設黃沁散巡河官各一員 衛

南都巡河官下四處新鄉崇福上崇福下衛南淇上散

巡河官各一員 滑濬都巡河官下四處武城白馬書

城教城散巡河官各一員 曹甸都巡河官下四處東

明西佳孟華陵城散巡河官各一員 曹濟都巡河官

下四處定陶濟北寒山金山散巡河官各一員凡二十

兵萬二千
諸埽物料場官掌受給本場物料分治監物

料場官同此惟崇福上下埽物料場官與當界官通管

收支 南京延津渡河橋官兼譏事管勾一員同管勾

一員掌橋船渡口譏察濟渡給受本橋諸物等事內譏

察事隸留守司餘浮橋官同此 皇統三年四月懷州

置黃沁河堤六勾管司後罷

元置都水監秩從三品掌治河渠并隄防水利橋梁牐堰

之事都水監二員從三品少監一員正五品監丞二員

正六品經歷知事各一員 至元二十八年置二十九

年領河道提舉司 大德六年陞正三品延祐七年仍

從三品 大都河道提舉司提舉一員從五品同提舉

一員從六品副提舉一員從七品 河南山東都水監

至正六年以連年河決為患置專疏塞之任設官品秩

同行都水監至正八年二月河水為患詔於濟寧鄆

城立行都水監九年又立河南山東等處行都水監十

一年十二月立河防提舉隸行都水監掌巡視河道從

五品十二年正月行都水監添設判官二員十六年正

月又添設少監監丞知事各一員 都水庸田使司

順帝至元二年正月置司平江尋罷五年十二月復立

皇明設都水司官專掌河道一切事屬工部

內侍省

遼北面近侍局設于侍御司官制見前南面內省官曰

續文獻通考 卷之九十三

內省使曰內省副使所屬有內藏庫官曰內藏庫提點其內侍省官曰黃門令曰內謁者曰內侍省押班曰內侍左廂押班曰內侍右廂押班曰契丹漢兒渤海內侍都知曰左承宣使曰右承宣使所屬有內庫官曰都提點內庫有尚衣庫官曰尚衣庫使有湯藥局官曰都提點勾當湯藥其上京東京各有內省司各置省使與省副使東京大內無宮嬪惟以省副判官守之

金內侍職見于衛尉司內內侍局中常侍見于宣徽使內其事多分領于宣徽使而內侍省不設

元內侍省亦不設其職不專宮禁事即文階亦授之按世祖始授宦者李邦寧御帶庫提點後漸遷禮部尚

書提點大醫院事武宗命為江浙行省平章政事仁宗時加開府儀同三司為集賢院大學士後又以内侍楊光祖為秘書郎譚振宗為武備卿關居仁為尚乘卿並授弘文館學士至文宗初年勅自今內侍勿授文階止授中官明年即授宦者續元暉昭文館大學士順宗時宦者朴不花以皇后寵官至集賢大學士崇正院使驕恣無上招權納賂雖為孛羅帖木兒所殺而亂亡不可救矣

皇明

太祖平吳之歲置內使監 洪武二年 諭吏部定內侍諸司官曰朕觀周禮所記未及百人後世至踰數千卒

爲大患今雖未能復古亦當爲防微之計古時此輩止治酒漿醢醢司服守桃事今朕亦不過以備使令非別有委任可斟酌其宜毋令過多又顧侍臣曰此輩自古以來求其善良千百中不一二見若用爲耳目即耳目蔽矣用爲腹心即腹心疾矣馭之之道但常戒勅之畏法不可使之有功有功則驕恣畏法則檢束檢束則自不敢爲非乃定置內使監奉御凡六十人尚寶一人尚冠七人尚衣十人尚佩九人尚履八人尚藥七人紀事二人執膳四人司脯二人司香四人太廟司香四人涓潔二人尚酒尚醋尚麵尚染四局局正一人副二人御馬御用二司司正一人副二人內府庫大使

一人副使二人內倉監令一人丞二人及置東宮典璽典膳典服典藥典兵典乘六局各局郎一人丞一人又置門官午門東華門西華門玄武門奉天門左右順門左右紅門皇宮門坤寧宮左門宮右門各門正一人副一人東宮春和門宮後門宮左門宮右門各門正一人副一人上因謂侍臣曰古之宦豎在宮禁不過司晨昏供役使而已自漢鄧太后以女主稱制不接公卿乃以閹人爲常侍小黃門通命自此以來權傾人主及其爲患如城狐社鼠不可去朕謂此輩但當服事宮禁豈可假以權勢縱其狂亂吾所以防之極嚴但犯法者必斥去之不令在左右戒履霜堅冰之意

也 三年八月定倉庫官品級設監令從五品丞從六品庫設提點從六品大使從六品副使從七品乙巳命改內使監 御用監秩皆從三品其官令從三品丞正四品 皇門官秩從四品門正從四品副正五品東宮門官正副同十月壬戌重定內使服飾之制 上諭宰臣凡內使監未有職名者當別置衣帽以別監官禮部定擬內使監官凡遇朝會照依品級具朝服公服行禮其常服葵花胸背團領衫不拘顏色烏紗帽犀角帶其內使無品從者常服團領衫無胸背花不拘顏色烏角束帶烏紗帽垂軟帶年十五以下者惟帶烏紗小頂帽從之 四年閏三月 命吏部定內監等官秩品

內使監令正五品授中衛大夫丞從五品侍直大夫皇門宮門正正六品授內侍郎門副尚寶奉御俱從六品授內直郎尚冠等奉御 內府庫大使內倉監令俱正七品授正奉郎庫副使倉丞俱從七品授正衛郎局正司正俱正六品授內侍郎局副司副俱從六品授內直郎 東宮門正局正俱正六品授內侍郎門副局丞俱從六品授內直郎 王府承奉門正所正俱從六品授內直郎承奉副門副所副俱正七品授正奉郎 五年六月丙子定宦官禁令凡內使於 宮城內相罵其先發而理屈者笞後罵而理直者不坐其不服本管鈐束而詆罵者杖內使罵奉御者杖罵門官監官者杖內

使等於 宮城內闔毆先闔而理屈者杖毆傷者加一等後應理直而無傷者笞其有不服本管鈐束而毆之者杖毆傷者加一等毆奉御者杖毆門官監官者杖傷者各加一等其內使等有心懷惡逆出不道之言者凌遲處死有知情而蔽之者同罪知其事而不首者斬首者賞銀三百兩 是年令禮部議考糾劾內官之法置內正司司正司副各一人正從七品專糾內官失儀不法者尋改爲典禮司又改典禮紀察司 六年六月巳酉更倉監爲 內府倉以 內倉監令爲大使監丞爲副使 內府庫爲承運庫仍設大使副使皆以內官爲之 乙卯以內官金麗淵爲 秦府承奉李清爲承奉

副劉壽吳祥劉旺潘亨爲 晉燕楚靖江府承奉副 八年二月壬申以 內府鈔庫爲寶鈔庫秩正七品設大使副使各一人以內官爲之 九年五月庚子以內侍宗亮等七十四人爲司香尚冠尚衣等職又置 人王 府典膳典珍二所以中官流官爲之 十年十一月置 神宮內使監掌 太廟灑掃陳設之事設監令正五品丞從五品司香奉御正七品典簿從九品 天地壇祠 祭署神壇署各設署令正七品丞從七品司香奉御正 八品 甲乙丙丁戊五庫庫設大使正七品副使從七 品及置 皇城門官端門承天門東長安門西長安門 東安門東上門東上南門東上北門西安門西上門西

上南門西上北門北安門北上門北上東門北上西門
門設正正七品副從七品 庚戌以內使金吉爲園丘
署令洪斌杜慶爲司香奉御 十二年四月置 內府
尚衣尚冠尚履三監針工皮作巾帽三局甲乙丙丁四
庫改尚珮局爲尚珮監 十六年三月乙卯置 內府
寶鈔廣源庫大使一人正九品用流官副使一人從九
品用內官 內府寶鈔廣惠庫大使二人正九品副使
二人從九品俱以流官內官兼之職掌出納楮帛入則
廣源庫掌之出則廣惠庫掌之 十七年四月更定內
官諸監庫局及外承運等庫局品職 尚宮局尚宮一
人正五品司記司言司簿司闈正六品掌記掌言掌簿

掌闈正七品女使六人 尚衣局尚儀一人正五品司
籍司樂司賓司贊正六品掌籍掌樂掌賓掌贊正七品
女使二人 尚服局尚服一人正五品司寶司仗司衣
司飾正六品掌寶掌衣掌仗掌飾正七品女使二人
尚食局尚食一人正五品司膳司醞司藥司饌正六品
掌膳掌醞掌藥掌饌正七品女使二人 尚寢局尚寢
一人正五品司設司輿司苑司燈正六品掌設掌輿掌
苑掌燈正七品女使二人 正功局尚功一人正五品
司制司珍司綵司計正六品掌制掌珍掌綵掌計正七
品女使二人 宮正司宮正一人正五品司正一人正
六品女使二人 內官監通掌內史名籍總督各職凡

差遣及缺員具名奏請設令一人正六品丞二人從六品典籍一人正九品所掌文籍以通書箋小內使爲之

神宮監掌 太廟祭器及祭祀灑掃設令一人正七

品丞一人從七品奉御一人正八品 尚寶監掌 御

寶圖書凡用 御寶則奏請然後付尚寶司官用之畢

則捧入設令一人正七品丞一人從七品 尚衣監掌

御用冠冕衣服靴履設令一人正七品丞一人從七

品奉御四人正八品 尚膳監掌 御膳設令一人正

七品丞一人從七品 司設監掌 御用儀仗輦輅衾

帳裯褥張設設令一人正七品丞一人從七品奉御四

人正八品 司禮監掌 宮庭禮儀凡正旦冬至等節

命婦朝賀等禮則定其班位儀注及糾察內官人員

違犯禮法者設令一人正七品丞一人從七品 御馬

監掌 御廐馬匹設令一人正七品丞一人從七品

直殿監掌各殿灑掃陳設設令一人正七品丞四人從

七品小內使一十五人 宮門承 制掌傳奉宣召設

奉御五人正八品 宮門守門官掌宮門灑掃時其開

闔譏察出入設門正一人正八品副四人從八品 內

承運庫掌 宮御金銀段疋等物設大使一人正九品

副使二人從九品 司鑰庫掌 皇城各門管鑰設大

使一人正九品副使四人從九品 巾帽局掌造 內

府冠帽設大使一人正九品副使一人從九品 針工

局掌造 內府衣服設大使一人正九品副使從九品
織染局掌織染段疋設大使一人正九品副使一人
從九品 顏料局掌燒造銀硃等項顏料設大使一人
正九品 司苑局掌種蒔蔬果大使一人正九品 司
牧局掌牧養孳牲設大使一人正九品皆於內官內選
用 外承運庫掌收金銀段疋等物 甲字庫掌收銅
錢布疋顏料 乙字庫掌收衣服衾帳紙劄等物 丙
字庫掌收絲綿紗線 丁字庫掌收銅鉄錫香茶蠟諸
物 戊字庫掌收氈衫胡椒分支收軍器 廣源庫掌
收貯寶鈔 廣惠庫掌收支寶鈔每庫設大使一人正
九品副使一人從九品皆於流官內選用隸戶部 皮

作局掌硝熟皮張成造靴鞋鞍轡 兵仗局掌造各項

軍器 寶源局掌鼓鑄銅器每局設大使一人正九品

副使一人從九品皆於流官內選用隸工部 時 公

主府初設家令司令丞錄事 二十三年改中使司

二十五年二月遣尚膳太監而聶司禮太監慶童齋

勅往諭陝西河州等衛所屬番族令其輸馬以茶給之

聶等至河州召必里諸番族以 勅諭之諸族皆感恩

意爭出馬以獻於是得馬萬三百四十餘疋以茶三十

餘萬斤給之諸族大悅而聶遣使入奏 命以馬分給

河南山西陝西衛所騎士按此內臣奉使行事之始

二十八年九月重定內官監司庫局與諸門官分 東

宮六局 王府承奉等官職秩 頌 皇明祖訓遂為

定制內官監十一曰神宮曰 尚寶曰 孝陵神宮曰

尚膳曰尚衣曰司設曰內官曰司禮曰 御馬曰印綬

曰直殿監皆設太監一人秩四品左右少監各一人秩

從四品左右監丞各一人秩正六品 神宮監掌灑掃

太廟殿庭廊廡尚寶監掌 御寶璽勅符將軍印信

孝陵神宮監掌灑掃殿庭及栽種果木蔬菜之事尚

膳監掌供養 奉先殿弁 御膳與 宮內食用之物

又督光祿司供奉 宮內諸進宴飲食之事尚衣監掌

御用冠冕袍服履舄靴帶之事司設監掌 御用車

輦床榻衾褥帳幔諸事內官監掌成造婚禮裝奩冠舄

傘扇衾褥帳幔儀仗及內官內使貼黃諸造作弁 宮

內器用首飾與架閣文書諸事司禮監掌冠婚喪祭禮

儀制帛與 御前勘合賞賜筆墨書畫弁長隨當差內

使人等出門馬牌等事及督光祿司供應諸筵宴之事

御馬監掌 御馬及諸進貢弁典牧所關收付內官

監收用及造內官諸人衣服鋪蓋諸事巾帽局掌造內

官諸人紗帽靴襪及預備賞賜巾帽之事司苑局掌

宮內諸處蔬果及種田之事酒醋麵局掌內官諸人食

用酒醋麵糖諸物內承運庫掌收支段疋金銀珠玉象

牙諸寶貨之物及同司鑰庫掌鈔之數司鑰庫掌各門

鎖鑰及收支錢鈔之事 內府供用庫掌 御用香米

及 內用香燭油米并內官諸人飲食果實之類其
 東宮典璽典藥典膳典服典兵典乘六局各設局郎一
 人秩正五品局丞二人秩從五品惟典璽局增設紀事
 奉御秩正六品典璽局掌 璽寶翰墨諸事典藥局掌
 同 御醫修合藥餌供進湯液之事典膳局掌供進膳
 羞典服局掌冕弁冠帽袍服佩刀靴襪諸物典兵局掌
 甲冑戈矛弓矢刀劍諸物典乘局掌車馬之事其 親
 王府承奉司掌 王府諸事凡事則呈長史司并護衛
 指揮使司行之與內官衙門不相統攝設承奉正秩正
 六品承奉副秩從六品所三日典寶曰典膳曰典服典
 寶掌 王之寶設典寶正一人秩正六品副一人秩從

六品典膳典服掌飲膳衣服之事各設正一人秩正六
 品副一人從六品門官二人掌 王城宮殿門啓閉關
 防出入設門正秩正六品門副從六品設內使十人司
 冠一人司衣三人司佩一人司履一人司藥二人司矢
 二人又 各公主位下設中使司掌府中諸事司正司
 副各一人皆雜職 三十年七月庚戌置都知監秩正
 四品掌 內府各監行移一應關支勘合設太監一人
 正四品左右少監各一人從四品左右監丞各一人正
 五品典簿一人正六品又置銀作局掌造 內府金銀
 器用設大使一人正五品副一人從五品

成祖永樂元年九月遣內官李興等齎 勅勞暹羅國王

昭祿群庸唆羅諦刺弁 賜王文綺帛及銅錢麝香諸物與其貢使偕行按此內臣奉使外夷之始 三年七月內使王琮同給事中畢進封故真臘國王長子叅烈昭平牙爲王按此內臣封夷王之始 是年三月 命太監鄭和等率兵二萬七千人行賞賜西洋古里滿刺諸國按此內臣將兵之始 五年三月辛巳復改上林署爲上林苑監秩正五品有左右副丞典簿之屬凡設十署秩正七品俱以內臣及文職相兼爲之後革內臣八年都督譚青等營有內官王安王彥之三保脫脫按此內臣監軍之始然名次青等後 是年 勅內官馬靖往甘肅巡視如鎮守西寧侯宋琥處事有未到處

密與之商議務要停當爾却來回話按此內臣出鎮之始然尚止巡視事畢回京 十八年立東廠 命內官一人主之專刺訪大小事情以聞 二十二年六月辛卯 上崩於榆木川太監馬雲等以六師在遠外秘不發喪與大學士楊榮金幼孜議合斂畢載以 龍輦所至 御幄朝夕上食如常儀壬辰次雙筆峰大學士榮御馬少監海壽馳訃 皇太子

仁宗洪熙元年正月丁未 命內官監太監鄭和領下番官軍備南京在內與太監王景弘朱卜花唐觀保協同管事遇外有事同襄城伯李隆駙馬都尉沐昕計議而行按此南京守備之始 是年二月 勅甘肅總兵官

都督費瓛鎮守太監王安按此鎮守之始見者

宣宗宣德元年七月 上以漢王反遣指揮譚順內官黃

讓內使陳錦助平江伯陳瑄鎮守淮安是時內臣尚列

于指揮之下 七年 賜司禮監太監金英范弘等免

死 詔弘略云克勤夙夜靡一事之後期致謹言行惟

一心之在國退不忍于欺蔽進必務于忠誠免爾死罪

於將來著朕至意於久遠見弘墓誌

按 宣宗賜免死罪 詔於光祿卿井泉張泌皆有之

則英亦所必有者又 賜 御用太監王瑾銀記四曰

忠肝義膽曰金貂貴客曰忠誠自勵曰心跡雙清見水

東日記於司禮太監金英范弘各有銀記之 賜見墓

誌 景廟於興安王誠舒良輩亦各有 賜 憲廟

賜司禮監太監譚昌牙記二曰忠誠不怠曰謙亨忠敬

銀記一曰才華明敏石記一曰補袞宣化 世廟 賜

司禮監太監張佐銀記四曰集謀補德曰端忠誠慎曰

輔忠曰勵忠麥福銀記一曰公勤端慎右皆見墓碑

按宣德末年京通二倉設總督內臣一人居中瑞館漕

輓者不堪其擾臨徐淮德各設督監內臣紛擾更劇至

嘉靖元年從戶部尚書孫交言悉取還京裁革館印中

外便之

英宗正統元年遣太監阮安同都督沈清少保吳中督造

三殿按此內臣督工之始 四年遣太監吳誠吉祥監

督諸軍討麓川宣慰司任發敗績按此內臣總兵之始
六年三殿工完太監阮安錢僧保各賜黃金五十
兩白金一百兩絲段八表裏鈔一萬貫按此內臣功賞
之至厚者 七年陞太監王振姪千戶山爲錦衣衛世
襲指揮同知尋命山侍經筵 九年命太監曹吉
祥出喜峰口劉永誠出界嶺口成國公朱勇等出劉家
口各率精騎萬人征兀良哈陞賞有差 是年賜遼
東鎮守太監亦失哈歲米四十石按此內臣加祿之始
十年賜司禮監太監王振各監太監錢僧保高讓
曹吉祥蔡忠白金寶楮綵幣諸物仍命振姪林爲錦
衣衛世襲指揮僉事僧保姪亮讓姪玉吉祥弟整忠姪

英俱爲錦衣衛世襲副千戶勅振曰朕惟旌德報功
帝王大典忠君報國臣子至情此恩義之兼隆古今之
通誼也爾振性資忠厚度量宏深昔在皇曾祖時特
以內臣選拔事我皇祖深見眷愛教以詩書王成令
器委用旣隆勤誠益至肆我先帝所器重特簡置朕左右朕自
春宮至登大位前後幾二
十年而爾夙夜在側寢食弗違保衛調護克盡乃心贊
翊維持靡所不至正言忠告裨益實多茲特勅賜給
賞擢爲爾後者以官詩曰無德不報書曰謹終惟始朕
眷念爾賢勞昕夕不忘爾尚體至意始終如一致我
國家有無疆之休爾亦有無窮之聞 十二年遼東鎮

守太監亦失哈楊宣以征討功給歲祿三十六石亦失哈給七十六石蓋十二石為一級 十三年寧陽侯陳懋為總兵官率師討鄧茂七等太監曹吉祥王瑾監督神機火器按此內臣監器之始 十四年大理寺卿俞士悅等以春夏二時不雨恐刑獄不清所致請會審刑部都察院獄以消天變 上命太監金英同三法司堂上官審之按此內臣審錄之始出則齋 勅張黃蓋騎導於大理寺為三尺壇中坐尚書以下俱左右列坐 是年虜人寇德勝門外 勅太監興安李永昌往同武清伯石亨尚書于謙整理軍務按此內臣總京營兵之始

景皇帝景泰三年總督少保尚書于謙總兵武清侯石亨等議選精兵十五萬分為十營太監阮讓都督楊俊提督四營太監陳瑄盧永都督郭震馮宗各提督三營俱聽謙亨及太監劉永誠吉祥節制按此內臣坐營之始 英宗天順元年正月以迎 駕功陞太監曹吉祥嗣子錦衣衛帶体指揮僉事欽為都督同知姪鉉及太監劉永誠姪孫聚蔣冕弟成葉達兄成俱為錦衣衛世襲指揮僉事且 賜吉祥等 勅書褒諭之 是年封司禮監太監曹吉祥姪欽為昭武伯按此內臣子弟封爵之始 欽自以戰功及從奪門封後反誅 是年 詔復司禮監太監王振官爵立祠 賜額曰旌忠按此內臣立祠

之始 八年 命太監周中於奮武營右少監王亨耀
武營太監唐順練武營右少監林貴奉顯武營太監張
溫敢勇營右少監趙永果勇營奉御鄭達效勇營右少
監米童鼓勇營左副使高蕪立威營奉御王璇伸威營
右副使張璘揚威營奉御張紳振威營監神鎗仍聽太
監劉永誠節制按此內臣分坐十二營之始

憲宗成化三年 御馬監太監葉達奏以長河峒功蒙
賜寶鈔幣帛辭之而陞兄錦衣衛千戶官兵部執以無
例不許 詔特陞為指揮僉事此內臣辭賞乞陞之始
十二年 命御馬監太監汪直立西廠領 勅刺事
按此立西廠之始雖與東廠侔而勢出其上 十三年

以御史戴縉言革西廠尋復之

按內臣 恩寵至於加祿建祠所可考者如天順中
御馬監汪直初以緝事功加歲米二十四石以建州
功加三十六石以威寧海功加四十八石以黑石崖功
加三百石後累至四百八十石至正德中司禮監太監
張永初以 恩加歲米十二石以平寧夏逆瑾功加四
十八石以獲妖人功加一百二十石後累至三百餘石
大約米至七十二石則視文武官為正一品而儀從衣
料亦累增益不可勝計蓋又王振劉瑾之所無也自永
後谷大用魏彬張雄張銳張忠輩亦及之又張司禮佐
初加歲米四十八石其後復加祿十有七皆十二石黃

司禮錦至五百石皆在嘉靖間具神道碑 成化初援
王振例 賜御馬監大監劉永誠特祠額曰褒功 賜
司禮監大監懷恩特祠額曰顯忠恩之後有覃昌其賢
亦相等自是請乞日繁不可勝紀然永誠以功恩以德
與王振不同時寧晉伯劉聚係永誠從子從永誠積戰
功至左都督自以破西虜功封襲

武宗正德元年春正月大監陳寬傳 旨神機營中軍二

司內官監大監劉瑾管五千營 御用監大監張永管

神機營并顯武營神機營右掖 御馬監徐智調中軍

頭司管奮武營而以司設監大監馬永誠代智 御馬

監大監王潤代瑾 五月以 御馬監大監魏彬管神

機營中軍頭司并奮武營此八虎之初見也 二年大

監李榮傳 旨邊關隘口等處切近京師舊設守備內

官仍舊添補薊州黃崖口等營以都知監左少監屈讓

臺頭營以都知監右少監王鑑永平太平寨青山營以

司設監左少監萬釗遵化灤陽等關以印綬監右少監

劉睿劉家口營以都知監右少監丞高永薊州鮎魚口

等處以印綬監右少監李準峨眉山等營以 御馬監

左少監馮旺黃花鎮以都知監左監丞張鼎天城兼管

神銳以 御馬監左監丞張仁淮安衛等處以都知監

右少監孟山各守備萬全左衛等處以都知監右少監

畢安分守蓋自是諸邊無餘地矣又增提督團營大監

苗達張永軍伴各百人坐營坐司太監黎安等各三十
五人又增五軍神機三千等營太監馬永成魏彬寧瑾
谷大用軍伴各百人坐司內官劉佶等各三十人 是
年太監李榮傳 旨御馬監谷大用之父奉 御用監
太監張永之父友俱陞錦衣衛指揮使此內臣父見在
授官之始 是年又贈御馬監太監丘聚司設監太監
馬永成御馬監太監魏彬之父俱錦衣衛指揮使毋贈
淑人各與祭一壇此內臣贈父母之始 三年太監李
榮傳 旨御馬監官勇士旗軍係禁兵重務其令太監
谷大用提督太監楊春坐勇士營李堂坐四衛軍營此
內臣預教場之漸 是年復立西廠尋改惜薪司以外

薪廠爲之以太監谷大用領焉 其年添設內辦事廠
於 榮府舊倉地以司禮監太監劉瑾領之兼察兩廠
及內諸司事 太監劉瑾傳 旨谷奉張友俱陞都督
同知復贈劉瑾父三代俱爲都督同知 四年太監劉
瑾奏疏通鹽法四事奉 旨經畫周詳防範嚴密誠爲
國家重務既多官會議戶部查筭明白經久通行軍民
戶口食鹽仍舊餘俱永遵行之司禮監立碑在側時常
省察按司禮監立碑始此 五年兵科給事中屈銓疏
奏請刊定正德元年以後見行事例編集成書頒布中
外 詔許之按此皆劉瑾所變更者國子祭酒王雲鳳
時亦有請 是年太監張永提督三千神機二營兼掌

十二團營掌 乾清宮事兼掌 御用監提督尚膳尚
衣司設內官諸監整容禮儀甜食諸房弁豹房浣衣局
混堂司南海子事按內臣兼職之多無踰于此 是年

命御用監太監張永總督寧夏等處軍務 御馬監

太監陸閻管領神鎗選京營精兵三萬討安化王寘鏞
兵部言舊無總督軍務太監關防特造給之時楊一清
為永墓志云特給金關防金爪剛斧楊與永同事所見
必真永之西征及還師 上皆幸東安門戎服送迎

是年以寧夏功加張永祿米歲四十八石賞銀五百兩
紵絲五十表裏時兵部尚書王敞等會英國公張懋尚
書劉機等議以仇鉞功止一方已封伯爵世襲永輯寧

中外兩建奇功又非鉞比於是永兄富弟容俱封伯給

誥券勛號尋加司禮監太監溫祥賴義李清秦文范
宣張欽祿米歲各十二石賞銀一百兩絲幣四表裏太
監谷大用兄大寬馬永成兄山魏彬弟英伯爵如容富

例 十一月替皇知縣王鑾疏稱太監張永功言今歲
五月赤旱千里永奉辭西征遇真定大雨隨澍百姓稽
首曰天上雨露張公帶來也永不坐乘不張蓋不作威

福真今之臯夔伊傳先後數千言極其諛媚 上覽奏
褒永亦百餘言再 賜勅獎諭 六年太監張永捕薊
州男子王豸足涅龍文及人王字以為妖異兵部尚書

何鑑請加永 恩典下廷臣議永疏辭 詔以永有功

固讓再加祿米歲百二十石 賜勅褒獎 七年以山東河南賊平總督太監谷大用陸閭歲加祿米四十八石廕弟姪各一人錦衣衛世襲指揮使監鎗張忠尹生歲加祿米二十四石廕弟錦衣衛世襲正千戶 御馬監太監丘聚祿米如張忠大用弟閭姪尋進封伯如永九年起太監張忠掌 御用監仍總制提督宣府大同延綏等處軍務發京營兵二萬人禦虜復發京兵六千人使太監張忠監督之聽永節制忠請自為一軍不許 是年 贈司禮太監張淮父全為錦衣衛都指揮使毋李為夫人廖鑾父文應毋張亦如之皆予祭葬 贈都指揮之有祭葬自全文應始 贈御馬監太監干

經父母亦如之并 賜香山寺祠額護 勅授司禮監太監張雄父千戶銳為後府都督支俸朝叅 賜鎮守浙江太監劉璟生祠額護 勅尋 賜代璟者王堂亦如之 十年兵部上打魚王山等處禦虜功內批司禮監太監蕭敬歲加祿米二十四石溫祥賴義秦文張雄張欽蔣貴韋霏張淮并 御馬等監太監谷大用張永魏彬張銳俱歲祿十二石各廕弟姪錦衣衛世襲正千戶 十三年以應州功太監張永魏彬張忠各歲加祿米二十四石廕弟姪一人為錦衣衛正千戶佛保馬英趙林蘇進馬睿許全李睿劉祥各歲祿十二石廕錦衣衛百戶又加司禮監太監蕭敬溫祥賴義秦文張欽蔣

貴韋霽張淮李英團營太監谷大用東廠太監張銳歲
祿廕官如張永等 十四年以營建 乾清宮定礫廕
總理提督 御用太監張永東廠太監張銳內官監太
監劉養 御馬太監孫和團營太監谷大用司禮太監
蕭敬魏彬溫祥賴義秦文張欽韋霽張淮李英弟姪各
一人為錦衣衛正千戶管工內官監太監劉祥劉永趙
俊王銳班浩汪俊趙銳崔文王富溫璽周永各副千戶
世襲 是年又命 御馬太監張忠提督軍務同威武
副將軍安邊伯朱泰平賊將軍右都督朱暉討寧王宸
濠 命鎮守撫按等官悉聽節制 上尋以太師威武
大將軍鎮國公總督軍務 命太監張永率團營及宣
府北路官軍提督贊畫機密重務平虜伯朱彬亦如之
以捕獲妖賊加太監張忠歲祿米二百二十石仍陞蔭
弟姪三級

世宗嘉靖元年三月 勅吏兵二部朕人繼大統賴爾內
外文武勲戚大臣定策弁迎立各宣忠悃保安 社稷
今 山陵及 徽稱大禮事畢宜加殊恩以荅元功大
學士楊廷和蔣冕毛紀首先定策忠義大節功尤顯著
俱進封伯爵給與 誥券子孫世襲食祿一千石餘官
如故俱仍在內閣辦事大學士費宏廕他一子錦衣衛
指揮使世襲親捧信符迎立等官駙馬都尉崔元進封
侯爵給與券誥子孫世世承襲食祿一千五百石 皇

親太傅壽寧侯張鶴齡加太師祿米三百石禮部尚書
 毛澄加太子太傅廕他一子為錦衣衛世襲指揮同
 知太監張錦廕他弟姪一人錦衣衛世襲指揮僉事定
 國公徐文祚中途有疾先已賞了罷司禮監各能同心
 贊襄大計太監扶安溫祥賴義秦文張欽張淮各歲加
 祿米三十六石廕他弟姪一人為錦衣衛世襲指揮同
 知蕭敬歲加祿米三十六石廕他弟姪一人錦衣衛世
 襲指揮使黃偉鮑忠各歲加祿米二十四石廕他弟姪
 一人為錦衣衛世襲指揮僉事從朕藩邸勤勞年久左
 右朕躬各有功績張佐歲加祿米四十八石廕他弟姪
 一人為錦衣衛世襲指揮使一人為世襲正千戶黃英

歲加祿米三十六石廕他弟姪一人為錦衣衛世襲指
 揮同知一人世襲正千戶戴永歲加祿米三十四石廕
 他弟姪一人為錦衣衛世襲指揮僉事一人為世襲百
 戶張忠歲加祿米二十四石廕他弟姪一人為錦衣衛
 世襲指揮僉事刁永馬俊賈友陳宜國洪趙山黃錦李
 清王埈孫端各廕他弟姪一人為錦衣衛世襲正千戶
 趙霖李堂李云張陞蘇瑾郭紳趙林張昂劉臣劉銳丁
 王劉榮各廕他弟姪一人為錦衣衛世襲百戶督兵迎
 駕道路惠安伯張偉歲加祿米三十石鄭宗仁趙璜
 各陞俸一級當時在朝宗人府五府六部都察院大
 理寺通政司等衙門掌印官各賞紵絲二表裏銀二十

兩科道官各賞紵絲一表裏銀十兩 皇親太保建昌侯張延齡加太傅祿米一百石指揮邵嘉進封伯爵副千戶邵輔陞指揮僉事百戶邵佐陞正千戶指揮蔣輪進封伯爵蔣壽陞錦衣衛世襲正千戶慶陽伯夏臣加散官一階舍人夏勳陞錦衣衛世襲正千戶如 勅奉行 六年大學士費宏等言 皇考實錄成其於 聖謨睿德紀載頗為詳實然臣等不敢自以為功也蓋累朝實錄皆有章奏可據若今 憲皇帝三十餘年之事臣等所賴以考據者則有司禮監太監張佐黃英戴永紱實錄一冊載 憲皇帝睿製序文及各年章奏為詳功當首論後又得司禮監太監楊保陳清錦衣衛正

千戶翟裕陸松為纂修之助功當併論伏惟 上裁上從其言 命廕佐等各弟姪一人以酬其勞佐指揮僉事黃英戴永俱正千戶楊保百戶陳清總旗俱錦衣衛世襲翟裕陸松俱陞指揮僉事時佐英永已用扈

駕功 賜廕心不自安上疏辭 上嘉其誠懇許之仍令原廕指揮使張琦於錦衣衛堂上管事指揮同知黃壽陞指揮使僉事戴仁陞指揮同知 八年革鎮守內臣景泰初中官用事始設各省鎮守內臣相沿九十餘年莫能釐正至是閣臣張璠柄政極力陳懇 上盡革之百年大患一旦蠲滌遠近鼓舞若更生永嘉相業此為稱首 十四年正月科臣管懷理言各倉內臣初蒙

釐革中外稱便自李宜用而諸倉漸復乎敬奏革鎮守
 弊本盡拔偶未及此而王奉李慎謀督京倉竊柄殘民
 乞革之戶部梁材覆言我朝酌古定制監局供事于
 內府部布治于外體統截然宣德正統始用內臣止一
 二人耳正德中濫收多闡民不堪命京通等倉督收有
 部臣巡視有臺臣綱舉目張萬世無弊內臣誠為冗官
 及臨淮徐德諸內臣盡宜革回從之十七年郭勛假
 條陳時事內欲復鎮守內臣革監收錢穀科道吏部許
 讚刑部唐龍工部溫仁和戶部李廷相各言監收應革
 兵部張瓚及科道言內臣初詔裁革以其貪殘害民
 永不差遣原非太祖舊制上曰內臣雖非舊制姑
 暫選用第勿作威喜事耳監收允令罷之二十五年
 承天守陵太監廖斌與巡按包節相構上命逮節
 詔獄謫戍窮邊

穆宗隆慶元年二月上加恩內臣歲加司禮監太監黃
 錦祿米二十四石廕弟姪一人錦衣衛指揮僉事王本
 馬保各弟姪一人錦衣衛正千戶胡明喬朗曹憲各弟
 姪一人錦衣衛百戶從龍太監梁鈿李芳歲加祿米
 三十六石廕弟姪一人錦衣衛指揮同知張仲舉翟廷
 玉陳鈿陶金呂用崔玉高相楊義張恩各廕弟姪一人
 錦衣衛正千戶宋朝用張潤楊添爵馮明夏雲嚴用李
 佑各廕弟姪一人錦衣衛副千戶張廷周保王榮李忠

李鑾趙朝郭陽李惠趙忠陳忠李祿各廕弟姪一人錦衣衛百戶于銳劉用各廕弟姪一人錦衣衛所鎮撫俱世襲 五月司禮監太監黃錦廕姪黃浦為錦衣衛都督僉事尋以罪革後復當廕其弟姪為錦衣衛指揮乃辭 新命而為浦乞復用會錦死事寢至是太監滕祥復為浦請及其族黃保六人以錦衣官守墓黃斌等三人為勇士乞之科道官交論其不可 上曰錦効勞年久素著誠慎黃浦特准起用 七月湖廣巡按劾太和山守備太監呂祥七罪乞徵還罷其官勿設兵部覆言太和山內臣始于成化止以提督道流不預民事罷之便從之祥還司禮監復令劉進往科臣言進即劉俊

先朝守 顯陵以貪酷遣戍 孝陵者也今避籍易名徵求復用退飽虎而復進餓虎可乎 上悟 命擇其代者更議以柳朝往兼分守如故兵部郭乾力爭之

上乃 命朝止督道流勿預民事 二年正月 命太監李佑督織造于蘇杭部臣言初奉 明詔取回督造內臣中外傳頌 聖德 詔墨未乾 制使復出殊駭 觀聽乞罷佑勿遣第令所司如式以進 上曰有 成

命矣趣予佑 勅科臣復奏乞如部議不聽 七月內使許義挾刃嚇財御史李學道執而笞之一日 朝罷內使百餘粹學道共毆幾斃舉 朝相顧錯愕科臣以

聞 上命緹騎執首禍十餘人杖之百遣戍南裔餘皆

杖發 孝陵從部臣王廷言也 三年十二月 乾清
宮尚衣少監黃雄以番休日私出徵子錢于市因而相
毆兵馬司繫之以白巡城御史楊松既而內監令校尉
趣雄入直校詭以 旨召松驗無實乃劾雄暴橫矯
詔雄亦入辯 上以楊松誣奏貶外司官黜爲編氓雄
發南京司香 是年直隸巡按劾鳳陽守備太監趙芬
貪酷驕僭乞下吏記載其員勿更設兵部覆請下御史
先繫治其黨會議去留從之 十二月 上諭災變頻
仍多緣部院政事不調信人濫訟假公營私致傷和氣
厰衛暗訪以聞科道交章言其不便尋亦罷之 五年
二月太監陳洪弟陳都以廢爲錦衣衛千戶科臣疏劾

不聽 六年六月十日 穆宗卽位高拱既授 顧命
欲復百官總已之義中人爲之側目又與二次輔謀去
馮保以清 宮禁張居正陰洩于保保遂矯 中旨以
去拱六月十一日昧爽傳 皇后懿旨 皇貴妃令旨
皇帝聖旨曰 大行皇帝睿天先一日 召內閣三
臣受 遺命 東宮冲年賴三先生竭忠輔佐以安
社稷今大學士高拱攬權擅政 朝廷威福輒敢自專
不復知有 主上罔測其意欲何爲吾母子驚懼不安
高拱令以少師中極殿大學士卽日出京回籍其諸大
臣受 國厚恩不知竭忠報主乃阿附權臣箠視幼君
自今各宜洗心滌慮毋蹈此轍校尉兵番共相迫逐一

夕遄行自昔大臣去 國未聞有狼籍如是者拱去而
居正爲首輔保掌司禮

今上萬曆八年閣臣張居正疏言該文書官丘得用傳奉
聖諭孫海客用凡事引誘無所不爲着降小火者發
去 孝陵種菜爾等司禮監并管事牌子既受 朝廷
爵祿我一時昏迷以致有錯爾等就該力諫方可爾等
圖我一時歡喜不言我今奉 聖母 聖諭教誨我我
今改過奸邪已去今後但有奸邪的小人爾等司禮監
并管事牌子一同舉名來奏該衙門知道傳示到閣臣
等看得孫海客用奸邪不忠引誘蠱惑以致虧損 聖
德舉動差錯上違 聖母慈訓下失臣民仰望之心論

祖宗法度宜正典刑罪在不赦 皇上心雖惱恨猶
不忍加刑薄從降斥燭奸之明等于日月宥罪之仁同
於天地矣但臣等查得舊例 孝陵種菜皆軍人爲之
二犯既發令着役不宜止降火者須充做淨軍乃爲正
法 上從之 居正又疏伏蒙 聖諭有先生等既知
此事就該諫朕教朕爲堯舜之君卿等也爲堯舜之臣
等語 皇上幡然改悔进去奸邪引咎自責又 宣諭
臣等盡心輔導此蓋 九廟 列聖之靈默啓我 聖
母之心形之譴責陰佑我 皇上之心自悔前非也聞
近日引誘之人在孫海客用固爲尤甚而其中諂佞希
寵放肆無忌者尚不止如二人如司禮監太監孫德秀

溫恭兵仗局掌印周海者皆不良之人其罪亦不在孫
 海客用之下今 皇上既將此二人寘之於法以示悔
 過自新之意則孫德秀等亦不宜姑容在內以為 聖
 德之累伏望 皇上下大奮乾斷將孫德秀等一體降黜
 以彰 日月之明其司禮監管事牌子等官平日為忠
 為佞諒莫逃於 聖鑒合無俱令自陳請自 聖斷老
 成庶謹者照舊管事諂佞放肆者悉加汰黜且近日
 皇穹垂象彗芒掃宦者之星亦宜大行掃除以應天變
 以光 聖德此 皇上修德改過之實政也臣等又聞
 漢臣諸葛亮云宮中府中俱為一體陟罰臧否不宜異
 同臣等待罪輔弼 宮中之事皆宜與聞臣居正又親

承 先帝遺命輔保 聖躬比之二臣責任尤重今乃
 徒避內外之嫌不行直言匡救以致 皇上有此過舉
 辜負 先帝付託之言萬死不足以自贖除痛自省勵
 以圖報稱外既蒙 皇上明發德音昭示 聖意臣等
 此後亦不敢復以外臣自限凡 皇上起居及 宮壺
 內事但有聞即竭忠敷奏及左右近習有邪佞不忠如
 孫海客用等者亦不避嫌怨必舉 祖宗之法奏請處
 治仍望 俯允施行 皇上亦宜仰遵 聖母慈訓痛
 自改悔戒遊宴以重 起居專精神以廣胤嗣節賞賚
 以省浮費却珍玩以端好尚親萬幾以明庶政勤講學
 以資治理庶今日之悔過不為虛言將來之 聖德愈

爲光顯矣奉 旨司禮監太監孫德秀溫泰兵仗局掌印周海都降三級着外私家閑住永不叙用其司禮監及管事牌子等都着自陳 十一年奏准小民犯禁私割致傷和氣者都察院行五城御史及通行各省直撫按衙門嚴加禁約自今五年以後民間有四五子以上願以一子報官闡割者聽有司造冊送部候收補之日選用如有私割者照例重治隣右不舉者一併治罪不宥

按 祖制內侍主傳 命掃除不通章奏隆慶以來䟽辯謝辭與公卿埒而溫 旨踰溢矣 世宗時前朝門無權稅者至萬曆二十五年以後畿外各省或以征權

或以開礦或以採木奉 委四出矣 太廟尊嚴而皇上行禘廟禮亦皆冠進賢服祭服以從 內府有事于中霤井竈例遣中人代祭亦以祭服從事與 國初亦少異焉

二十九年八月司禮監傳奉 聖旨 乾清宮司禮監太監田義孫隆陳矩成敬管事沈金崔文升劉進孫成周臣張祥牌子馬進田詔劉進忠楊科各陞二級歲加祿米十二石趙朝歲賞祿米十二石 御藥房提督內官監太監王永賞銀五兩紵絲一表裏近侍 御馬監太監孫順歲加祿米十二石煖閣內答應 御馬監太監董杲閔梅李進谷朝何朝邵進內官監太監侯金尚

衣監左監丞李吉祥各賞銀五兩紵絲一表裏 御馬

監太監劉統尚膳監太監劉震趙昇內官監太監鹿成

御馬監太監黃榮司設監太監趙楷俱着內府騎馬

御馬監太監王勛蘇朝俱賞玉帶小轎牌子尚膳監

太監王臣 御用監太監武祥都賞玉帶近侍尚膳監

太監任進殷着本監僉押尚膳監太監張友于忠張全

左尤魏受趙忠尚衣監太監王昇陳忠費德黃春芳內

官監太監陳憲楊順溫成王坤張恩司設監太監趙相

張王王惠 御馬監太監徐志諸明各賞銀五兩

紵絲一表裏內官監左少監盧潤陞太監奉 御蔣升

陞 御用監右監丞管垣 守尚膳監太監王奉李守寧

都賞蟒衣人數司房內官監太監韋仁賞銀五兩紵絲

一表裏尚衣監左監丞任時 御用監左監丞殷良弼

俱陞右少監尚膳監右監丞白吉祥陞左監丞奉御李

宗仁陞 御用監右監丞小火者楊進朝賞牙牌帶管

司房 御馬監太監袁福賞銀五兩紵絲一表裏 御

用監太監黃佩賞飛魚尚衣監左少監羅俊陞太監尚

膳監左監丞劉進忠周尚德劉忠李進朝俱陞左少監

又司禮監傳奉 聖旨各處礦稅天津等處督征廣安

店租 御用監右少監馬堂陞左少監廣東抽稅兼管

珠池內官監太監李鳳賞蟒衣福建開礦兼抽稅 御

馬監右少監高竇陞左少監雲南開礦兼抽稅尚膳監

太監楊榮賞斗牛遼東等處開礦征收稅課馬市方物
 尚膳監右少監高淮陞左少監管理通灣廣和店租帶
 管蘆溝橋抽稅名馬 御馬監太監張燁賞斗牛江西
 湖口征收船稅 御馬監左監丞李道陞右少監總理
 兩淮鹽法 御用監太監魯保賞斗牛儀真等處抽稅
 御馬監左少監暨祿陞太監浙江抽稅兼開礦劉成
 陞少監四川礦稅 御馬監太監丘乘雲賞銀五兩紵
 絲一表裏陝西抽稅名馬 御馬監右少監梁永陞左
 少監山西太原府等處抽稅兼採木尚衣監右監丞孫
 朝陞左監丞廣西等處水路通御弁土產貨物稅課及
 開採礦稅 御馬監右少監沈永壽陞左少監南京徵

收房租帶管池州等處開採南京中備司禮監太監邢
 隆劉朝用各歲加祿米十二石 外有王虎張忠賞銀
 五兩紵絲一表裏胡濱李敬每陞右少監俱在近侍例
 內又司禮監副蘇松織造太監孫隆進到秋運龍袍漆
 器織造的好奉 旨歲加祿米十二石 又傳奉 上
 旨司禮監太監孫隆着在內坐櫬

按中貴柄司禮則王振劉瑾數將大兵則曹吉祥汪直
 然皆不克令終惟張永初自 春宮得幸於 上累加
 提督三千神機二營兼掌十二團營 乾清宮掌事兼
 掌 御用監提督尚衣司設內官二監整容禮儀甜食
 諸房并豹房浣衣局混堂司南海子出總督寧夏等處

軍務特 給金關防金瓜鋼劍還改司禮監太監掌監
事再起掌 御用總制提督宣大延固等處軍務還總
理 乾清大工再督團營兵馬從 上禦虜應州為監
督機務從 上征寧庶人為提督贊畫重務罷閑復起
掌 御用提督團營凡一縮司禮三縮 御用綬三督
團營再總大兵再扈 上領樞密出許便宜行事及
鎮聽制父友科都督同知兄泰安伯富弟安定伯容右
都督寰餘官復十餘人貴勢傾一時而名位不衰又
國初內官監太監鄭和以永樂四年率師二萬七千人
駕海舶齎 勅諭金帛行賚西洋瑣里暹羅等三十餘
國皆隨使入朝所奉獻及互市採取未名之寶以巨萬

計凡一破國都再虜逆 命王一擒大盜酋凡二十年
而首 命提督南京守備至宣德八年復齎 詔由陸
路 諭西番諸國今西南夷及世所稱三寶太監者鄭
和也西北所稱劉馬太監者則 英廟時劉永誠也皆
本朝中貴之翹楚云

續文獻通考卷之九十三終

本傳中貴之錄卷二

味少西共散蘇羅黑太監者限 英瀾和隆宋始少者
詔 備西者諸國令西南夷又世所稱三寶太監者漢
而首 命其督兩京守尚至宣慰人平野齋 臨由劉
信丹一姪國格再氣故 命王一餘大盜會以二十年

續文獻通考卷之九十四

皇明進士雲間王圻纂輯

職官考 樞密院宣徽院至資正等院

樞密院

宋寧宗嘉定八年置三省樞密院主管架閣文字

理宗寶祐四年十一月以張礪同知樞密院事丁大全簽

書院事馬天驥同簽書院事

遼北而北樞密院掌兵機武銓羣牧之政見兵部凡契丹軍

馬皆屬焉以其牙帳居大內帳殿之北故名北院元好

問所謂北衙不理民是也南樞密院掌文銓部族丁賦

之政見吏部凡契丹人民皆屬焉以其牙帳居大內帳殿

續文獻通考卷之九十四

一四七京

之南故名南院元好問所謂南衙不主兵是也設官在北院者加北院二字在南院者加南院二字曰樞密使曰知樞密使事曰知樞密院事曰樞密副使曰知樞密副使事曰同知樞密使事曰簽書樞密院事曰都承旨曰副承旨曰林牙曰知院貼黃曰給事知聖旨頭子事曰掌院頭子曰樞密院敝史曰樞密院郎君曰樞密院通事曰樞密院掾史其分屬有樞密院中丞司官曰樞密院檢點中丞司事曰總知中丞司事曰左中丞曰右中丞曰同知中丞司事曰樞密院侍御以上設官北南二院並同世宗天祿元年始置北院樞密使以安搏為之又行軍時有行樞密院官曰左右林牙曰參政 南

面太祖初置漢兒司韓知古總知漢兒司是也太宗入

汴因晉置樞密院掌漢人兵馬之政初兼尚書省後止

官曰樞密使曰知樞密使事曰知樞密院事曰樞密副

使曰同知樞密院事曰知樞密院副使事曰樞密直學

士曰樞密都承旨曰樞密副承旨曰吏禮房承旨曰兵

刑房承旨曰戶房主事曰廳房主事即工部也遼初有阿扎割

只所掌未詳乃遥輦故官也後併樞密院

興宗重熙二十一年詔南北樞密院日再奏事時蕭孝忠

奏樞密有二風俗所以不同若併為一天下甚便未及

行而薨

金樞密院天輔七年始置于廣寧府 天會三年下燕山

初以左企弓為使後以劉彥宗初猶如遼南院之制後則否 泰和六年嘗改為元帥府樞密使一員從一品掌凡武備機密之事樞密副使一員從二品簽書樞密院事一員正三品同簽樞密院事一員正四品後增一員經歷一員從五品都事一員正七品掌受軍府事檢勾稽失省署文牘兼知宿直之事 貞祐三年置行樞密院于歸德 架閣庫管勾一員正八品知法二員從八品掌檢斷各司刑法之事餘檢法同樞密院女直十二人漢人六人三品官子弟四人吏員轉補二人譯史三人通事三人回紇譯史一人曳刺十五人

金制凡樞密院上下所倚任者各奏事官其目有三一曰承受聖旨二曰奏事三曰省院議事皆以一人主之承

受聖旨者凡院官奏事或上處分獨召奏事官付之多至一二百言或直傳上旨辭多者即與近侍局官批寫奏事者謂事有區處當取奏裁者殿奏其奏每嫌費辭必欲言簡而意明退而奉行即立文字謂之檢目省院官殿上議事則默記之議定歸院亦立檢目呈覆有疑則復稟無則掾史施行其赴省議者議既定留奏事官與省左右司官同立章奏圓覆諸無相異同則右司奏上此三者之外又有難者曰備顧問如軍馬糧草器械軍帥部曲名數與夫屯駐地里扼塞遠近之類凡省院一切事務顧問之際一不能應輒以不用心被譴其職為甚難正大中以白華居其任

熙宗天眷元年八月改燕京樞密院爲行臺尚書省

宣宗貞祐三年置行樞密院于徐州歸德府

元制樞密院秩從一品掌天下兵甲機密之務凡宮禁宿衛邊庭軍翼征討戍守簡閱差遣舉功轉官節制調度無不由之

世祖中統四年置樞密副使二員僉書樞密事一員

至元七年置同知樞密院事一員院判一員

二十八年始置知院一員增院判一員又以中書平章商量院事

成宗大德十年革去議事平章 仁宗

延祐四年以分鎮北邊增知院一員五年增同知一員

後定置知院六員從一品同知四員正二品副樞密二員從二品僉院二員正三品同僉二員正四品院判二

員正五品參議二員正五品至正間復置議事平章二

人添設僉院一人院判一人經歷二員從五品都事四

員正七品承發兼照磨二員正八品架閣庫管勾一員

正九品 客省使至元十四年置大使一員後增一員

二十一年置副使一員延祐五年增一員至天曆中又

定置大使二員從五品副使二員從六品令史二人內

斷事官掌處決軍府之獄訟至元元年置二員後定置

八員正三品經歷一員從七品有令史譯史等人

武宗至大元年七月汰省樞密院官世祖時樞臣止六員

成宗增至十三員至是署事者三十二員樞臣乞省之

勅罷塔思帶等十餘人

樞密所屬右衛左衛中衛前衛後衛武衛親軍都指揮使司隆鎮衛親軍都指揮使司左右翼屯田萬戶府左右衛率府河南淮北蒙古軍都萬戶府八撒兒萬戶府札忽兒台萬戶府脫烈都萬戶府和尚萬戶府左右阿速衛親軍都指揮使司回回砲手軍匠上萬戶府唐兀衛親軍都指揮使司貴赤衛親軍都指揮使司延安屯田打捕總管府大寧海陽屯田打捕所忠翊侍衛親軍都指揮使司俱分別別具

皇明不設樞密官凡軍旅諸務一歸于兵部

行樞密院

元初有征伐之事置行樞密院大征伐則止曰行院爲一

方一事而設則稱某處行樞密院或與行省代設事已則罷 四川行樞密院中統四年始置設官二員管四川軍民課稅交鈔打捕鷹房人匠及各投下應管公事節制官吏諸色人等并軍官遷授征進等事始置于成都 至元十年又於重慶別置東川行樞密院設官一員十六年罷兩川行院二十四年復立四川行院于成都 江南行樞密院掌調度軍馬之事 至元十九年詔于揚州岳州俱立行院各設官五員二十一年立沿江行院二十二年立江西行院馬軍戍江州步軍戍撫州二十八年徙岳州行院于鄂州徙江淮行院于建康其後行院悉併歸行省 甘肅行樞密院武宗至大四

年置行院於甘州爲甘肅等處行樞密院設官四員提調西路軍馬後以甘肅省丞相提調遂罷行院 河南行樞密院泰定帝致和元年分置專管調遣之事文宗天曆初罷 嶺北行樞密院天曆間置知院一員同知二員副樞密一員僉院二員同僉一員院判二員經歷一員都事二員宣使四人掌邊庭軍務凡大小事宜悉從裁決 湖廣江西行樞密院世祖時置 成宗卽位罷之以其事歸行省 順帝至元三年右丞相伯顏奏准於四川及湖廣江西之境江浙凡三處各置行樞密院以鎮遏奸亂之民四年俱罷 至正十五年又置淮南江北等處行樞密院於揚州十六年又置江浙行樞密院於杭州二十六年置福建江西等處行樞密院 雲南行樞密院 文宗至順元年以雲南諸王禿堅叛詔發諸道兵討之立雲南行樞密院以撒里帖木兒知院事探馬赤爲同知教化爲副使發朶甘思朶思麻及鞏昌諸處軍萬三千人分道進兵

樞密分院

順帝至元三年分樞密院鎮北邊 至正十五年置樞密分院於衛輝彰德直沽又置於沂州以指揮使司隸焉 按元世祖至元七年許衡上疏曰兵之於國在古已重在後世爲尤重故樞密之設特與中書對持號爲二府兵興則宰相主之事寧則樞密任事蓋宰相平章軍國

兵事可知也而兵之籍則不與樞密兼總兵馬兵籍可知也而兵之符則不在體統相維無有偏失制雖近代而意實倣古或者謂樞密併於中書爲合古冢宰總百官之意殊不知古者冢宰止一人而今之爲宰輔者動輒數十人此而不古而謂樞密者獨可以古耶國家切務止在得人苟未得徒紛更於此無益也

皇明不設行院分院遇有軍興征發則用兵尚書兵侍郎帶銜以出事畢仍回部

太子宰相兼樞密使

元世祖中統四年以皇太子守中書令兼判樞密院事至正十三年令皇太子領樞密使 十八年以叅政崔

敬爲山東等處行樞密院副使分院於鄴州兼領屯田事 十九年四月以察罕帖木兒爲河南行省平章政事兼河南山東等處行樞密院知院

皇明國初置大都督府因樞密院而改建之也樞密院之職實古太尉大司馬諸將軍而其名則循唐宦官之舊五季托肺腑之權據宰相上宋顯兵政稍與宰相次而號兩府然皆縉紳大夫爲之至元而用其國人與漢人之以武功顯者第往往叅一二縉紳以贊其摹畫至

明興而截然屬之武弁矣初 高皇帝之下集慶置中書省卽置行樞密院而自領之功臣宿將得序遷爲同知僉院同僉判官其品秩皆仍元舊至四年辛丑之三

月改置大都督府 拜皇姪爲大都督節制中外諸軍
尋增置左右都督同知副使僉事官以中書叅議李善
長兼司馬宋思顏爲叅軍經歷都事皆極一時之選而
同知僉院之在軍行者尚仍其故不改吳元年甲辰正
月卽位定大都督從一品左右都督正二品同知從二
品副使正三品僉事從三品尋大都督李文正坐罪廢
罷不設以左右都督爲長官十月進階俱正一品同知
從一品副使正二品僉事從二品三年革副使陞僉事
正二品凡天下將士兵馬大數廕授遷除與征討進止
機宜皆屬之十三年分大都督爲五軍都督府若以爲
品秩如其故者而兵部陰移之其權漸分矣至永樂而
盡歸之兵部所謂五都督者不過守空名與虛數而已
其左右都督以下至同知皆以加邊將之有功者其僉
事以待序遷者而掌印僉書之類必以屬公侯伯間有
屬老將之實爲都督者不能什一也

宣徽院

遼

北面有宣徽北院掌北院祇應御前之事有宣徽南院掌
南院祇應御前之事皆太宗會同元年置其官在北院
者加北院二字在南院者加南院二字曰宣徽使曰知
宣徽事曰宣徽副使曰同知宣徽事北南二院並同北
面宮官以建諸宮幹魯朶部族蕃多故以官統之有諸

行宮都部署院總契丹漢人諸行宮之事官曰諸行宮
都部署曰知行宮諸部署司事曰諸行宮副部署曰諸
行宮判官有契丹行宮諸部署司總行在行軍諸幹魯
朶之政令官曰契丹行宮都部署曰知契丹行宮都部
署事曰契丹行宮副部署曰契丹行宮判官有行宮諸
部署司掌行在諸宮之政令官曰行宮都部署曰行宮
副部署其宮十二曰太祖弘義宮曰太宗永興宮曰世
宗積慶宮曰應天皇后長寧宮曰穆宗延昌宮曰景
宗彰愍宮曰承天皇后崇德宮曰聖宗興聖宮曰興
宗延慶宮曰道宗太和宮曰天祚永昌宮曰孝文皇太
弟敦睦宮曰文忠王府其各宮府設官曰宮使曰宮副

使曰宮太師曰宮太保曰宮侍中亦各世燭其分屬有
某宮都部署司掌本宮契丹軍民之事官曰某宮都部
署曰某宮判官有某宮提轄司官制未詳有某宮馬羣
司官曰侍中曰敝史 南面宣徽院亦太宗會同元年
置官曰宣徽使曰知宣徽院事曰宣徽副使曰同知宣
徽使事曰同知宣徽院事南京宣徽院宣徽使下多知
宣徽院使事一員而無同知宣徽使事 南面宮官有
漢兒行宮都部署院 亦曰南面行宮都部署司聖官曰
漢兒行宮都部署曰漢兒行宮副部署曰知南面行宮
副部署曰同知漢兒行宮副部署曰同簽部署司事曰
都部署判官每十二宮設官曰某宮漢人行宮都部署

日某宮南面副都部署曰某宮同知漢人都部署
聖宗開泰八年置勃海承奉宮都知班押

金

宣徽院左宣徽使正三品右宣徽使正三品同知宣徽院

事正四品同簽宣徽院事正五品宣徽判官從六品掌

朝會燕享凡殿庭禮儀及監知御膳所隸弩弓傘子二百三十九人控鶴

二百人 拱衛直使司威捷軍隸焉舊名龍翔軍 正隆

二年更爲神衛軍 大定二年更名拱衛司都指揮使

從四品副都指揮使從五品掌總統本直謹嚴儀仗舊

止曰使曰副使五年加指揮號什將長行威捷軍承安二年

簽弩手千人泰和四年以之備邊事 鈐轄正六品都轄從九品 客省使

正五品副使從六品掌接伴人使見辭之事 引進使

正五品副使從六品掌進外方人使貢獻禮物事 閤

門明昌五年閤門官以次排轉除授 東上閤門使正五品明昌六年省一員作從五

品西 副使二員正六品明昌六年省一員西同 簽事一員從六品

掌簽判閤門事西同明昌六年以減副使置 西上閤門使二員正五

品副使二員正六品簽事一員從六品掌贊道殿庭禮

儀西閤門與副貳同 閤門祗候二十五人正大間三人 閤門通事

舍人二員見通事舍人日 從七品掌通班贊唱承奏勞問之事

承奉班都知正七品掌率本班承奉之事舊置判官後

罷 內承奉班押班正七品掌總率本班承奉之事

御院通進四員從七品掌諸進獻禮物及薦享編次位

續文獻通考 卷之九十四 五廿京

序 尚衣局提點正五品使從五品副使從六品掌御

用衣服冠帶等事都監正九品直長正八品同監從九

品 儀鸞局 泰和四年或以少府監官兼或兼少府監官 提點正五品使從

五品副使從六品掌殿庭鋪設帳幕香燭等事直長四

員正八品收支都監正九品二員一員掌給受鋪陳諸

物一員掌萬寧宮收支庫同監二員從九品 司吏二人如內藏庫

知書 尚食局 元光二年參用近侍奉御奉職 提點正五品使從五品

副使從六品掌總知御膳進食先嘗兼管從食官直長

一員正八品 不限資考 都監三員正九品 不限資考 生料庫都

監同監各一員掌給受生料物色 收支庫都監同監

各一員掌給受金銀裘諸色器皿 以外路差除人內選充 尚藥

局提點正五品使從五品 出職官內選充 副使從六品掌進湯

藥茶果直長正八品都監正九品果子都監同監各一

員掌給受進御果子 本局本把四人 太醫院古屬太常寺金

屬宣徽提點正五品使從五品副使從六品判官從八

品掌諸醫藥總判院事管勾從九品隨科至十人設一

員以術精者充如不至十人併至十人置 不限資考 正奉上

太醫 一百二十月非除 副奉上太醫 不第月日 長行太醫 不第月日 十科

額五十人 御藥院提點從五品直長正八品掌進御

湯藥 明昌五年設以親信內侍人充 都監正九品 不限員 同監從九品 不常

除 教坊提點正五品使從五品副使從六品判官從

八品掌殿庭音樂總判院事諧音郎從九品 不限資考員數

內藏庫大定二年分四庫使從五品副使從六品掌內府珍寶

財物率隨器都監等供奉其事直長一員 頭面庫都

監正九品同監從九品本把七人大定二年定出身依不入寢殿小底例 段

疋庫都監正九品同監從九品本把十人 金銀庫都監

正九品本把八人 雜物庫都監正九品同監從九品本把八人

每庫知書各二人 宮闈局舊名宮闈司大定二年改為副使 提點正

五品使從五品副使從六品掌宮中閤門之禁率隨位

都監同監及內直各給其事直長正八品內直一百七

十人 內侍局令二員從八品與定五年陞作從六品 丞二員從

九品與定五年陞從七品 掌正位閤門之禁率殿位都監同監及

御直各給其事局長二員從九品與定五年陞正八品御直內直共六十四

人明昌元年分宮闈局正位內直置初隸宮闈局 東門都監同監諸隨殿位

承應都監同監掌各位承應及門禁管鑰 昭明殿都

監同監大定二十九年設各一員 隆徽殿都監同監本隆和殿係皇后位

承暉殿都監同監麗妃位 鸞翔殿都監同監 崇儀殿

都監同監 迎暉殿都監同監七妃克容太和三年罷 藥珠殿

都監同監 瑞寧殿都監同監 回春殿都監同監

芸香殿都監同監 瑞像殿都監同監係佛殿 凝福温

芳二位都監同監 瑤華柔則二位都監同監 嘉福

等殿位都監同監 廣仁殿都監同監 睿思殿都監

同監 滋福殿都監同監以隆慶改 咨政殿都監同監

邇英殿都監同監 長慶院都監同監 仙韶院都監

同監 貞和門都監同監 錢帛經此出明 昌中添一員 右昇平門

都監同監 長樂門都監同監 瓊林苑都監同監 各

一員 廣樂園都監同監 順儀位提控都監同監 舊寶 林位

瑞華門都監 一員 同監 三員舊名 金骨朵門 太師位提控都監

同監 寶昌門都監同監 會昌門都監同監 東京

孝寧宮都監同監 崇妃位提控都監同監 世宗夫 人興陵

惠妃位提控都監同監 裕陵明昌 四年添 温妃位提控都監

同監 明昌四 年添 報德寺提控都監同監 世宗御容 光太門街 報

恩寺提控都監同監 世宗 明昌 下設三員 孝嚴寺都

監同監 在南京安宣宗御 下皆在南京 寧福殿

都監同監 三 純和殿 血同監 三 仁安殿都監同

監 三 真妃位都監同監 二 麗妃位都監同監 宣

儀位都監同監 莊獻妃位都監同監 三廟都監同

監 西華門都監同監 京後園都監同監 內侍奇

祿官 泰和二年設初隸宮 闈局尋直隸宣徽院 所以陞用內侍局御直內直

有年勞者 中常侍 正五 品 給事中 從五 品 內殿通直 正六 品先

名內殿 給使 黃門郎 從六 品 內謁者 正七 品 內侍殿頭 從七 品 內侍

高品 正八 品 不限員 內侍高班 從八 品 典衛司 大定二十九年 世宗才人寶林

位各設泰和五年閏八月以崇妃薨罷與定元年 復設世宗妃才人寶林位各設防衛軍導從人 令正

七品丞從七品 孝靖宮 章宗五妃位大安元年以 有監同無總領者故設 令

從八品丞正九品端妃位同監 真妃徒 單氏 慧妃位同監 麗

徒單 氏 真妃位同監 柔妃唐 括氏 靚儀位同監 昭儀夾 谷氏 才媛位

同監修儀吾古論氏懿安家令貞祐三年為莊獻太子設從八品丞正九

品宮苑司令從六品丞從七品掌宮庭修飭洒掃啓

閉門戶鋪設氈席之事直長一員八品都監同監二員

尚醞署令從六品丞從七品掌進御酒醴直長正八品

二員典客署令從六品丞從七品直長後罷書表十八人

侍儀司舊名擊執局大定元年改為侍儀局大定五年陞局為司令從六品舊曰

掌侍奉朝儀率棍案擊奉輦各給其事直長正七品萬寧宮提舉司提

舉從六品同提舉從七品掌守護宮城殿慶寧宮提

舉司提舉正七品兼龍門縣令同提舉正八品兼儀鸞

監二提舉皆屬尚書以其為宮事故附載于此

太后兩宮官屬正大元年置衛尉從三品副衛尉從四

品左典禁右典禁從五品奉令正七品奉丞正八品太

僕正六品副僕正七品門衛二員正六品典寶二員正

六品謁者二員從六品閣正從七品閣丞從八品食官

令正八品宮令正八品宮丞正九品醫令正八品醫丞

正九品飲官令正八品飲官丞正九品主藏從八品副

主藏從九品主廩從八品副主廩從九品此不屬宣徽院附載于此

元

元置宣徽院秩正三品掌供玉食凡稻梁牲牢酒醴蔬果

庶品之物燕享宗戚賓客之事及諸王宿衛怯憐口糧

食蒙古萬戶千戶合納差發係官抽分牧養孳畜歲支

芻草粟菽羊馬價直收受闡遺等事與尚食尚藥尚醞

三局皆隸焉所轄內外司屬用人則自為選定置使六員從一品同知一員正二品副使二員從二品僉院二員正三品同僉二員正四品院判二員正五品經歷二員從五品都事三員從七品照磨一員承發架閣庫一員並正八品其屬附見 大都尚飲局 上都尚飲局 大都尚醞局 上都尚醞局 大都醴源倉 尚珍署掌收濟寧等處田土子粒以供酒材以上俱至元二十三年定置達魯花赤一員令一員並從五品丞二員正七品吏目二員 安豐懷遠等處稻田提領所 尚舍寺掌行在帷幙帳房陳設之事供養駱駝供進愛蘭乳酪定置太監二員正四品少監監丞各二員知事一

員 諸物庫秩從七品掌出納大德四年置設提領大使副使各一員 闡遺監掌闡遺人口頭疋諸物延祐七年定置大監一員正四品少監二員正五品監丞二員正六品知事一員從八品提控案牘一員從九品

尚食局掌供御膳及出納油麵酥蜜諸物至元二年置提點領進納百色生料二十年省併尚藥局為尚食局別置生料庫本局定置提點一員從五品大使一員正六品副使一員正七品直長一員正八品

尚食尚藥古
隸殿中監

大都生料庫至元十一年置生料野物庫隸尚食局二十年別置庫置提點二員從五品大使二員正六品副使二員正七品 上都生料庫掌受弘州大同虎賁司

農等歲辦油麵大都起運諸物供奉內府放支宮人宦者飲膳提點一員大使一員副使二員品秩同上 大都上都大倉各一掌內府支持米豉及酒材米麵藥物至元五年初立設官三員俱受制國用司使劄付十二年改立提舉大倉設官三員隸宣徽後定置二倉各提舉一員正六品大使一員從六品副使一員從七品大都上都柴炭局各一置達魯花赤各一員正七品大都大使一員上都大使二員各正七品副使各二員正八品直長各一人掌葦場典吏各一人 尚牧所至大四年置設提舉二員從五品同提舉一員從六品副提舉一員從七品吏目一員 沙糖局掌沙糖蜂窠煎造

及方貢果木至元十三年置十九年定置達魯花赤一員從五品提點一員從五品大使一員正六品副使一員正七品 永備倉掌受兩都倉庫起運省部計置油麵諸物及雲需府所辦羊物以備車駕行幸膳羞至元十四年置二十四年置提點一員從五品大使一員正六品副使一員正七品 豐儲倉掌出納車駕行幸支持膳羞大使一員從九品 淮東淮西屯田打捕總管府掌獻田歲入以供內府及湖泊山場漁獵以供內膳至元十四年始立總管府并管漣海高郵湖泊提舉司沂州等處提舉司事十六年置揚州鷹房打捕達魯花赤總管府二十二年省并爲淮東淮西屯田打捕總管

府二十五年以兩淮新附手號軍千戶所隸本府及提
 舉司一十處定置達魯花赤一員正三品總管一員正
 三品同知一員正五品府判一員正六品經歷一員從
 七品知事一員從八品提控案牘一員從九品司吏六
 人 淮安州屯田打捕提舉司高郵屯田打捕提舉司
 招泗屯田打捕提舉司安東海州屯田打捕提舉司揚
 州通泰屯田打捕提舉司安豐廬州等處打捕提舉司
 鎮巢等處打捕提舉司塔山徐邳沂州等處山場屯田
 提舉司凡九處各設達魯花赤一員提舉一員並從五
 品同提舉一員從六品副提舉一員從七品吏目三人
 抽分場提領所凡十處曰柴墟東西口曰海州新壩

曰北砂太倉曰安河桃源曰太湖東西口曰時堡興化
 曰高郵寶應曰汶湖等處曰雲山白水曰安東州每所
 各設提領一員同提領一員副提領一員俱受宣徽院
 劄付 滿浦倉掌收受各處子粒米麵等物以待轉輸
 京師至元二十五年置設大使一員正八品副使一員
 正九品 圓米棋子局軟皮局各置提領一員同提領
 一員副提領一員俱受宣徽劄付 手號軍人打捕千
 戶所管軍人打捕野物皮貨至元二十五年置設達魯
 花赤一員從四品上千戶一員上副千戶一員彈壓一
 員 龍慶栽種提舉司管領縉山歲輸梁米并易州龍
 門淨邊官園瓜果桃梨等物以奉上供至元十七年置

延祐七年改縉山為龍慶州因以名之定置達魯花赤一員提舉一員並從五品同提舉一員從六品副提舉一員從七品弘州種田提舉司掌輸納麥麵之事以供內府定置達魯花赤提舉一員並正六品同提舉一員正七品副提舉一員正八品直長一員豐潤署掌歲入芻粟以共飼養駟馬之事定置達魯花赤一員令一員並從五品丞一員從六品直長一員正八品常湖等處茶園都提舉司掌常湖二路茶園戶二萬三千有奇採摘茶芽以供內府至元十三年置司統提領所凡十有三處十六年陞都提舉司又別置平江等處權茶提舉司掌歲貢御茶二十四年罷平江提舉司併掌其職定置達魯花赤一員提舉一員俱從五品同提舉一員從六品副提舉一員從七品提控案牘一員都目一員烏程武康德清長興安吉歸安湖汶宜興提領所七處每所各設正同副提領各一員俱受宣徽院劄付掌九品印建康北苑武夷茶場提領所提領一員受宣徽院劄掌歲貢茶芽直隸宣徽

中政院

古無此供奉中宮之職故附于宣徽院後

元

成宗元貞二年立中御府以脫忽伯唐突並為府卿四年改中御府為中政院院使七員正二品同知二員正三品僉院二員從三品同僉二員正四品院判二員正五

品掌中宮財賦營造供給并番衛之士湯沐之邑其幕
 職司議二員從五品長史二員正六品照磨兼管勾承
 發架閣一員正八品所屬附見 中瑞司掌奉寶冊卿
 五員正三品丞二員正四品典簿二員從七品 內正
 司掌百工營繕之役地產孳畜之儲以供膳服備賜予
 卿四員正三品少卿二員正四品丞二員從五品典簿
 二員從七品照磨兼管勾一員從九品領署二提領局
 一及其司屬凡十有六歲賦之額工作之程歲終則會
 其數以達 尚工署令一員從五品丞二員從六品掌
 營繕雜作之役凡百工名數興造程式與其財物皆經
 度之而責其成 皇慶元年置 列赤局秩從七品提領大使

副使各一員直長二員掌裁製縫綫之事 延祐六年置 贊

儀署秩正五品提領大使副使各一員直長二員掌車

輿器備雜造之事 皇慶二年置

管領六磐山等處怯憐口民匠都提舉司秩正四品達

魯花赤一員都提舉一員同提舉副提舉各二員知事

提控案牘各一員初未有官署賦無所稽至大中遣使

覈實始著籍設司所屬附見 奉元等路平涼等處甘

肅寧夏等路察罕腦兒等處長官司凡五處秩正五品

各設達魯花赤一員長官一員副長官一員提控案牘

一員都目一員吏十人 延祐二年以民匠提領司所

領地里濶遠人戶散處于政不便乃酌遠近衆寡立長

綱文獻通考卷之九十四
官司提領所以分理之提領所凡十並正七品奉元等路鳳翔等處平涼寧環等處開城等處察罕惱兒等處甘州等路沙肅等路永昌寧夏等路長城等路各設提領同提領副提領一員典史一人分掌怯憐口地方隸各長官司

翊正司令五員正三品丞四員正四品典簿二員從七品照磨一員從八品掌怯憐口民匠五千餘戶歲辦錢糧造作以供公上至元三十一年始置御位下管領隨路民匠打捕鷹房納綿等戶總管府正三品復隸正宮位下延祐六年改翊正司歲終會其出納以達于院而糾其弊領提舉司二提領所一管領上都等處諸色

人匠提舉司達魯花赤一員提舉一員從五品同提舉一員從六品副提舉一員從七品直長都目吏目各一員元貞元年置管戶二千五百有奇管領隨路打捕鷹房納綿等戶提舉司設官同上管領歸德亳州等處管民提領所秩從七品提領同提領副提領典史各一員初平江南收附歸德楚通等三百五十六戶令脫忽伯管領大德二年始置提領所典飲局秩正七品大使副使各二員典史一員攢典二人掌醞造酒醴以供內府及祭祀燕享賓客頒賜之給初置嘉醞局秩六品隸家令至大二年改典飲兩都分置皇慶元年撥隸中宮

官領大都等路打捕民匠等戶總管府達魯花赤一員
 總管一員並正三品同知二員正四品副總管一員正
 五品經歷一員從七品知事一員從八品提控案牘照
 磨一員掌錢帛造作之事初平定河南諸郡收聚人戶
 一萬五千有奇置官管領至元二十年改隸中尚監二
 十六年始置總管府後屬中政領提舉司十有一提領
 所二十有五 在京提舉司二涿州保定真定冀寧河
 南大名東平東昌濟南等路提舉司凡九秩俱從七品
 各設達魯花赤一員提舉同提舉副提舉都目各一員
 提領所二十五處大都等路東安州濟寧曹州沂州
 完州河間濟南濟陽大同元氏冀寧晉寧歸德南陽懷

孟汝寧衛輝曹州涿州真定中山平山大名高唐等處
 各設提領同提領副提領典史各一員

管領諸路打捕鷹房民匠等戶總管府達魯花赤一員

總管一員正三品同知一員正五品副總管二員從五

品經歷一員從七品知事一員從八品提控案牘照磨

各一員吏以下不錄掌錢糧造作之事大德三年始置元貞

元年撥隸中宮位下領提舉司四提領所十有一 管

民提舉司大都等路冀寧等路南陽唐州等處河南路

府等處凡四司秩從五品每司設達魯花赤一員提舉

同提舉副提舉都目各一員 提領所十有一大都保

定河間真定南陽鄧州濟南高汝汴梁裕州汝濟陳州

唐州泌陽襄陽湖陽晉寧冀寧等處各設所秩正七品
每所提領二員同提領副提領典史各一員

江浙等處賦財都總管府置官與諸路打捕鷹房總管
府同掌江南沒入貲產課其所賦以供內儲領提舉司

三庫局各一 平江松江建康等處提舉司凡三處秩
並正五品每司各設達魯花赤一員提舉同提舉副提

舉都目吏目各一員司吏六人 豐盈庫提領一員大
使副使各一員典史一人掌收本府錢帛 織染局局

使一員典史一人掌織局歲造段匹
管領種田打捕鷹房民匠等戶萬戶府秩正三品掌歸

德亳州永宿二十餘城各蒙古漢軍種田戶差稅初隸
塔察兒王位下其後改屬中宮萬戶經歷知事提控案

牘各一員令吏四人領司屬凡十處 管領大名等處
種田諸色戶總管府秩正五品總管副總管都目各一

員 管領本投下大都等處諸色戶都達魯花赤秩正
五品達魯花赤與提控案牘都目各一員 管領大都

河間等路打捕鷹房總管府秩正五品總管副總管都
目各一員 管領東平等路管民官秩正五品總管副

總管都目各一員 管領大名等路宣撫司 燕京路
管民千戶所秩從五品提領副提領各一員 管領曹

州等處本投下民戶 管領東明等處本投下戶計
管領蒲城等處本投下諸色戶計 管領汴梁等路本

投下種田打捕驅戶四提領所秩正七品提領各二員
同提領副提領各一員典史司吏各一人

海西遼東哈思罕等處鷹房諸色人匠怯憐口萬戶府
秩正三品達魯花赤一員萬戶副萬戶經歷知事各一

員提控案牘兼照磨一員譯史一人掌錢糧造作之事
管領哈思罕等處肇州朶因温都兒諸色人匠四千戶

仍領鎮撫所千戶所 鎮撫司鎮撫一員吏一人 哈
思罕等處打捕鷹戶怯憐口千戶所秩從五品達魯花

赤千戶副千戶吏目各一員司吏四人彈壓一人部役
二人至大三年置提舉司延祐六年改千戶所 諸色

人匠怯憐口千戶所秩從五品設官同上吏目為都目
無彈壓初為提舉司後改千戶所 肇州等處女直千

戶所 朶因温都兒乃良哈千戶所 灰赤兒等處怯
憐口千戶所 開元等處怯憐口千戶所 石州等處

怯憐口千戶所 瀋陽等處怯憐口千戶所 遼陽等
處怯憐口千戶所 蓋州等處怯憐口千戶所 盤旋

等處怯憐口千戶所
遼陽等處金銀鐵冶都提舉司秩正四品都提舉同提

舉副提舉案牘提控各一員譯史一人吏六人奏差二

人掌辦金銀砮鐵等課分納中書省及中政院七年盡
歸中宮 寶昌庫提領一員大使一員掌受金銀砮鐵

之課以待儲運 金銀場提領所凡七梁家寨銀場明

世銀場密務銀場寶山銀場燒炭峪銀場胡寶峪金場
七寶山甜炭金場俱從七品每所各設提領同提領副
提領各一員 鐵冶管勾所凡二處各設管勾同管勾
副管勾一員 奉宸庫秩五品提點四員副使二員提
控案牘一員庫子六人掌中藏寶貨錢帛給納之事
廣禧庫達魯花赤一員提舉一員大使一員副使二員
提控案牘一員庫子四人大德八年掌收支御膳野物
職視生料庫
已上皆屬中政院又有諸路怯憐口民匠以善造作屬
中宮者詳總管下

皇明

國朝不設宣徽中正二院 國初設承天門待詔一員閭
門使四員觀察使十員後皆裁凡事涉 宮闈如尚衣
尚膳等皆統于內侍所掌見內侍省下而酒膳等別立
光祿寺所掌見光祿寺下醫藥等項別立太醫院所掌
見太醫院下其錢帛製造等事則有寶鈔提舉諸司及
承運等庫御馬等倉俱屬戶部亦有與內侍同事者今
列于后

寶鈔提舉司

提舉一員

副提舉一員

後不設

典史一員

後革

鈔紙局

大使一員

副使一員

後不設

印鈔局

大使一員後革 副使一員後不設

寶盈庫後添設

大使一員 副使一員嘉靖三十二年革

寶鈔廣惠庫

大使一員 副使二員嘉靖三十二年革

廣積庫

大使一員 副使一員嘉靖三十二年革

典史一員嘉靖三十二年革

贓罰庫

大使一員 副使二員嘉靖三十二年革

承運庫

大使一員 副使一員嘉靖三十二年革

外承運庫後革

大使一員 副使一員

甲乙丙丁戊字庫

大使各一員 副使六員今止甲丙丁副使一員

行用庫後革

大使一員 副使一員

御馬倉後添設

大使一員 副使一員

太倉銀庫

大使一員

軍儲倉後革

大使一員

副使一員

長安西安北安東安門倉

副使各一員

張家灣檢校批驗所

大使一員

副使一員

俱隆慶六年革

龍江鹽倉檢校批驗所

南京

大使一員

副使一員

長信寺

古無

元成宗大德五年置長信寺秩正三品領大幹耳朶怯憐

口諸事卿四人少卿二人丞二人經歷知事各一人以

宦者為之所屬三

怯憐口諸色人匠提舉司領大都

上都二鐵局并怯憐人匠所材木鐵炭皮貨諸色備幹

耳朶各支房帳之需置達魯花赤提舉同提舉副提舉

各一人 大都鐵局掌幹耳朶上下往來粧釘房車

上都鐵局職掌同

長秋寺

古無

元文宗皇慶元年立長秋寺秩正三品掌武宗五幹耳朶

戶口錢糧營繕諸事寺卿五人少卿二人丞二人經歷

知事各一人其屬二 怯憐口諸色人匠提舉司其一

掌正宮造作之役一掌武宗軍士北來人匠

至大元年幹耳朶三

位下撥到人匠五百九十三戶始置提舉司隸中政院後屬長信寺

承徽寺 古無

元英宗至治二年置承徽寺秩正三品掌答兒麻失里皇后位下錢糧營繕等事寺卿五員正三品少卿二員從四品寺丞二員從五品經歷知事各一員其屬二法憐口諸色人匠提舉司二秩正五品各設達魯花赤一員提舉同提舉副提舉各一員

長寧寺 古無

元英宗至治三年立長寧寺秩正三品掌速哥八剌皇后位下戶口錢糧營繕等事寺卿六員正三品少卿二員正四品寺丞二員正五品經歷知事各一員

長慶寺 古無

元泰定帝元年立長慶寺秩正三品掌成宗幹耳朶及常歲管辦禾失房子行幸怯薛台人等衣糧之事寺卿六員少卿二員寺丞二員品秩同長寧寺經歷知事各一員

寧徽寺 古無

元文宗天曆二年立寧徽寺秩正八品隸八不沙皇后位下寺卿六員少卿四員丞二員品秩同長慶寺經歷知事各一員

徽政院 古無

元順帝元統元年依太皇太后故事為皇太后置設立官

屬三百六十有六人 掌謁司秩正三品卿四員少卿四員丞二員典簿二員至元二十三年改典寶署為掌謁司 三庫監秩正三品卿三員太監少監丞各二員 經歷知事照磨各一員掌供須文成藏珍三庫出納之事 典牧司秩正三品令丞各四員照磨一員掌供帳及扈從蓋造之人大德十一年後改入羣牧監 章慶使司秩正三品司使四員同知副使司丞各二員經歷都事各二員照磨管勾各二員 奉徽庫秩從五品提點大使各二員副使四員庫子六人掌內庫供給至治三年罷併入文成等庫 壽和署秩正五品署令四員署丞六員舊隸儀鳳司皇慶元年改隸徽政院遂為章

慶使司之屬後罷 上都掌設署秩正五品署令五員署丞二員後罷 掌醫監詳見太醫署 修合司藥正司詳見太醫署 行篋司藥局廣濟提舉司詳見太醫署 羣牧監詳見太僕寺 掌儀署秩正五品令丞各二員堂戶口房舍等泰定元年改典設局上都掌儀署官秩職掌同至治三年罷 江西財賦提舉司秩從五品達魯花赤一員提舉同提舉副提舉各一員掌事產戶口錢糧造作事至元二十七年立至治二年罷 織染局局使副使局副各一員相副官一員 桑落娥眉洲管民提領所提領副提領各一員 龍興打捕提領所提領副提領各一員 鄂州等處民戶水陸事產提

舉司達魯花赤一員提舉同提舉副提舉各一員掌太子位下江南園囿田土莊宅人戶至元二十一年立瑞州上高縣戶計長官司秩從五品達魯花赤長官副長官各一員領本處戶八千 已上俱隸徽政院 管領大都等路打捕鷹房膳脂人戶總管府詳都總管下資正院 古無

元順帝至元六年為完者忽都皇后置後又改崇政院秩正二品院使六人同知僉院同僉院判各二人經歷都事管勾照磨各一人

皇明不設長信寺以下諸職其事悉分統二十四監見內侍省門

續文獻通考九十四卷終

續文獻通考

三十一

Table with 10 columns and 1 row of text. The text is mostly obscured by a large watermark.



白話見內

...

...

92/94

